

Ruhanga Ahabw'okuba Omutungi W'embabazi

Phoenix, Arizona, USA

Okw'okubanza 19, 1965

1 Nimubaasa kushutama. Mbaire . . . nari nshemereirwe munonga, kutaahamu nkareeba Ow'eishe-emwe Moore n'abandi boona hanu aha kituuti, abanywani abu manyire okumara emyaka mungi munonga. Buzima n'omugisha kubareeba hanu ekiro eki. Niinyehurira ndi nka mukye kwemerera hanu nkabuurira n'abakugu omu by'ediini nk'aba bari enyima yangye, obundi shana nibaza kungorora ku ndaashobye. Nyine amatsiko ntyo.

Tushemereirwe munonga ekiro eki kugira omuntu w'omutaano hanu, Ow'eishe-emwekazi Rose. Tubaire nitushuma . . . Mbaire ndi n'Ow'eishe-emwe Shores n'omuhwezi we, eriizooba, kutunga kyamushana nkye. Kandi ku tubaire nitwija, Ow'eishe-emwe Williams yaagira ngu Ow'eishe-emwekazi Rose arwariire kimwe. Tutyo twataahamu kumureeba akaanya kakye, twatsimba amaju. Abaire aine omushwija mwingi munonga, buzima arwariire kimwe. Kwonka twashaba eshaara ngufu, Mukama yaagamba naitwe, yaagira ati, "Naaza kukira." Ati, "Naija kuba ariyo nyencakare ekiro," nikwo bagizire. Mbwenu ngugu hanu ekiro eki, ashutami hanu hanu. Ekyo ni kirungi.

2 Ow'eishe-emwekazi Rose, yemerera akaanya kakye konka, nikwo ba . . . Nitusiima Mukama. Abaire arembeire omu kitanda. Agizire ati, "Si-sitaane ansingwire omuri buri kintu. Nyizire kunu naarwarirayo egi," endwara nanka y'aha maraka, n'ebindi. Kwonka Mukama amutambiire, n'ahabw'ekyo tushemereirwe ahabw'ekyo. Nitusiima Mukama omukundwa!

Hati tubaire twine obwire burungi. Nyencakare ekiro, hati, nituza kuri-omuri Ramada. Kandi muteebwa hati, tirurikuza kuba hanu nyencakare ekiro, niruza kuba ahari Ramada. Kandi oruteerane nirutandika ekiro ekirikukurataho. Nimumanya, nibaza kungumisiriza ekindi kiro kimwe.

3 N'ahabw'ekyo nyomwabazyo ekiro mpi-mpingwize munonga ahu mbaire nshemereire kugarukira, ndi nk'owaayeraganiise kakye ngu, aha kibanza mwaka, ngu ninza kucwa bugufu obwo Butumwa kuruga aha shaaha ishatu nari ina, eshaaha itaano, kugaruka obundi nk'aha dakiika makumi ashatu nari makumi ana. Kandi nk'oku mbagambiire nyomwabazyo ekiro, omukazi wangye akansiima aha Sande, yaagira ati, "Okozire gye buzima." Ahabw'ekyo-n'ahabw'ekyo, tihariho kubanganisa, ngarukire naabishiisha nyomwabazyo ekiro, mwareeba. Kwonka mazire edakiika makumi ataano na itaano, omu mwanya gwa makumi ashatu, nyomwabazyo ekiro.

Ku twaba nitwija, ekiro eki, Billy yambuuza ati, "Waaza kubuurira ahari ki?"

Naamugarukamu nti, "Mbwenu, nyine ebi mpandiikire hanu bikye, hamwe n'Ebyahandiikirwe bikye. Tindikumanya, bimwe aharibyo, Obutumwa buna nari butaano butarikushushana." Naagira nti, "Niinyehuriramku ndaahikyeyo, haza nkareeba ekirikugyeda omu maisho."

Yaagira ati, "Oraganiise kushabira abo bantu boona abarwaire."

Naagarukamu nti, "Eego, sebo. Oine kaada zingahi?"

Ati, "Magana abiri."

Naagira nti, "Nshemereire kuba nizo naatandikiraho, ekiro eki."

Atyo yaagira ati, "Hati oijukye, oine edakiika ikumi na itaano zonka z'okubuurira." Ati, "Ezindi ozikoreise nyomwabazyo ekiro." [Ow'eishe-emwe Branham n'abeeteraine baasheka -Omur.] Nituza kurahutsyaho, tikwo?

4 Buzima, tubaraganiise, ku nituza kushabira abantu abo abaine kaada z'ab'okushabirwa, kandi nitu-nitugyemwa kuhikiiriza okuraganisa okwo, buzima. Boona titurikubaasa kubarabya omu nyiriri ezi, kandi nabwo tinkabaasa kubeeta buri omwe okwe, bari okwo omu bantu. N'obu Omwoyo Orikwera yaakukiinyoreka, titinkabaasa kukikora. Nikinkiza amaani. Kandi, kwonka twena nitumanya ebintu ebyo. Nitumanya ngu Ruhanga akiri Ruhanga. Tikyo ekyo ekikiza. Kiri ngu ekyo kyombeka okwikiriza kwonka, kutuma twamanya ngu-ngu turi omu Kubaho Kwe.

N'ahabw'ekyo, ekiro eki, twaza kushabira abantu abo boona abarwaire, abo boona abaine ezo kaada z'ab'okushabirwa, bashabirwe. Reero nyencakare ekiro, okwo ahari Ramada, nituza kugyezaho kugaba ezindi reero tutandikye tubashabireyo, 'habw'okuba nkiineyo nyencakare ekiro. Kandi nintekateeka ngu nyine ekiro kimwe ky'oruteerane, obundi na kyantsya nayo. Nikirugiirira oku ebintu biraabe.

5 Hariho abandi, omwe aha babuurizi otaizire; na hati takaizire, tindikuhamya. Ow'eishe-emwe Hamburg, nimmanyisa niwe ogwo . . . [Ow'eishe-emwe yaagira ati, "Amburgy." -Omur.] Amburgy, Amburgy, Kash Amburgy. Obwo na-naaryatura kubi buzima, eryo n'eiziina ry'Orugirimaani. Ni-nintekateeka n'ery'Orugirimaani. N'ahabw'ekyo obundi nyine kugyezaho kurifoofooza, nk'oku turikukyeta, munsaasire egoy migambire, ahariwe.

N'ahabw'ekyo tubaire twine obwire burungi omuri Mukama, n'obu kiraabe. Ahariimwe mwna, ku haraabe hariho abagyenyi hanu ekiro eki, buzima tushemereirwe kuba naimwe, kandi nitwesiga ngu Mukama naaza kubaha omugisha. Ninshaba ngu hatabaho omuntu weena orwaire omu kyombeko eki twaba nituruga hanu ekiro eki, ngu Mukama waitu ashuumre omu maani Ge maingi akize boona abarwaire n'abarikubonabonesibwa.

6 Hanu obwire obwahingwire, nkaba nkira kugiraho okwehanuuza kw'omutaano omuntu okwe, enhonga zimwe ezigumire ezi twabaire tutamara. Bwanyima abantu baayeyongyera munonga, okuhitsya obu kyahikire ahu, Mukama yaagumire naakiha omugisha, okuhitsya obu twatungire abantu magana ashatu nari magana ana abategyereize, reero abantu baguubwa kubi ahabw'okutegyereza munonga. Obundi, omu bwire buraingwa nk'obwo, kikaba kikwetaagisa kutegyereza obundi omwaka gumwe nari ebiri, nikwo obona kutaahamu ohikwaho, mwareeba, omu bwire oburi ahagati y'enteerane, kubahanuurira. Kandi tukaba tushutama tutegyereza Mukama okuhitsya obu Yaabaire atugambira egyo nshonga buzima.

Tihariho kubanganisa hariho abantu abashutami hanu ekiro eki abaizire omu kwehanuzaho kw'omutaano okwo. Bariho? Ka tubareebe nimwimutsya emikono yaanyu. Omu kwehanuzaho kw'omutaano. Eego, bashutami aho, n'ahabw'ekyo, nibamanya ngu ago n'amazima. Tukaba tutegyereza kureeba eki Mukama araagambe kyonka, eki enhonga egyo . . . Bwanyima ekyo nkateekwa kukireka hanu obwire obuhingwire. Nkagambira Billy ku tutakibaasa kugiraho okundi kwehanuzaho omu mubonano.

7 Mwareeba, ni-ni-niho mpingwize emyaka makumi abiri n'etaano, enshumi nkye egingwire, omurundi gwa kabiri, kandi nyorekyereire omurundi gwa kashatu. Kandi ku orikweyongyeraho kakye kukura, ahabw'enki, toriku, no . . . oku biri tokaabaasa kugumizamu nk'oku waabaire otwaza. Entambo zaawe ziba ngufu. Kandi-kandi, hatariho kubanganisa, Ow'eishe-emwe Moore ekyo takagizire eki yaakimanyaho. We . . . Nintekateeka ngu turi haihi kwinganisa emyaka.

Kwonka emyaka mingi egingwireho okwiha obu nyowe naiwe, n'Ow'eishe-emwe Brown twija hanu omurundi gw'okubanza, turi n'Ow'eishe-emwe Outlaw n'Ow'eishe-emwe Garcia, n'Ow'eishe-emwe Fuller. Hoona abashajja abo bakaaba bari hanu ekiro eki? Ow'eishe-emwe Garcia, Ow'eishe-emwe Fuller, Ow'eishe-emwe Outlaw, bari hanu? Mwimutsye emikono yaanyu mwaba muri hanu. Eego, ngugwo Ow'eishe-emwe Fuller, nintekateeka, ku ndaabe ntashobize. Ow'eishe-emwe Outlaw ngugu hanu. Ow'eishe-emwe Garcia, ni-niinyikiriza nabwo ngu akafuruka Phoenix. Ningira ngu ekyo nikwo kiri. A-akafuruka Phoenix, kandi ari omuri California. Mbwenu, buzima bikaba biri ebiro birungi munonga, kandi ninkiikiriza Obutumwa nibwo bumwe obu naabaire nyine buri, "Yesu Kristo tahinduka; oku abaire ari nyomwabazyo n'erizooba nikwo ari, kandi nikwo ariguma ebiro byona." Ningira ngu harabireho nka . . . Buzima, Becky akaba ari omwerefere. Egyo ni nk'emyaka ikumi na mwenda.

Kwonka hati n'omwishiki muhango, okuzire, ogomokire, orikushusha kubi, w'emyaka ikumi na mwenda oine ahu ashutami aho. Ori nkahi, Becky? Mwojo 'we, ninza kwefuuza eki naakigambira. Niinyjuka mukikiire omu mikono yangye. Buzima gukambeera omurimo gugumire kukikora ekiro eki.

8 Niinyjuka ekiro kimwe omu kanisa y'Ow'eishe-emwe Garcia, kakaba kari akaana kato munonga. Nkagira nti, "Twine oruteerane rw'amahanga maingi ekiro eki." Naagira nti, "Nimbuurira Abanya-Spain." Ntyo naagira nti, "Omukazi wangye hanu n'Omugirimaani." Nti, "Ndi Omunya-Ireland." Naagumizamu nti, "Kandi akaishiki kangye kato n'Akahindi," ogwo akaba ari Becky.

N'ahabw'ekyo ku naarabire omu muryango gw'enyima ninshohora, hakaba hariho omwishiki muto w'Omumekisiko aheeru aho, yaagira ati, "Ow'eishe-emwe Branham!"

Nti, "Eego, mukundwa, nooyenda ki?"

Ati, "Torikureeba ngu omwana waawe naayererukamu, takaaba Omuhindi?" Aine eishokye eriri nk'obunyaatsi bwomire, noomanya.

Naanye naagira nti, "N'Omuhindi orikweyoreka."

Mbwenu, nitusiima, kureeba ngu, twagaruka kuba hanu ekiro eki. Hati tutakataahire omu Kigambo, ka Tumushabe, ahakuba Niwe Kigambo. Ekigambo ku kyorekwa, ogwo aba Ariwe omuriwe.

9 Nk'oku tubuuriirwe nyomwabazyo ekiro aha Mbibo Y'okutaikirizana, egyo migisha ya Mukama, mugisiimire? [Abateeraine baagira bat, "Amiina." -Omur.] Naanye-naanye buzima nkisiimire kubareetera obwo Butumwa. Kandi nitureeba ezo mbibo eki ziri.

Hati, ebyo hariho ekyetengo ky'omutaano ekiro eki, ekintu eky'omutaano? Obundi bamwe omuriimwe mwena abarikuza kuba omu runyiriri oru rw'ab'okushabirwa, mugire muti, "Ai Ruhanga, ogire mbabazi. Ku ndaije kushabirwa, k'okwikiriza kwangye kweyongyere mbone kuhikiiriza ebirikwetengwa." Kandi-kandi obundi hariho oine omukundwa, orwaire, nari ekindi kintu. Noobaasa kwimutsya omukono gwawe nikwo Ruhanga areebe ahansi agire . . . Hati ekyo ku . . . Timurikumanya oku ekyo kirikutuma naayehurira kureeba aho. Kyo reeba ebyo byetengo ebiri hanu! Abaheereza bagyenzi bangye, kyo nimubireebe. Mwareeba? Hati, ekyo ku kiraabe nikituma naayehurira batsyo, Tataitwe we nikimukora kita? Buzima.

Hati ka tushabe.

10 Yesu omukundwa, hati nitwirira haihi n'Ekitebe kikuru ky'okusaasira, omu Iziina kamara byona eri. "Ahakuba tihariho rindi Iziina eryahairwe abantu erishemereire kutujuna, kureka Eiziina eri ryonka rya Mukama Yesu." Mbwenu nitwija omu Iziina Rye. Kandi nitushaba, Taata ow'omu Iguru, ngu Otwakiire, ekiro eki, nk'abaana

Baawe abarikwikiriza. Kandi osaasire obutaikiriza bwaitu, Mukama. Tuhwere ekiro eki, nikwo kibe ngu twikiririze kimwe buri Kigambo kya Ruhanga ekiro eki, ahabw'ebintu byona ebi tukyenire.

Noomanya ekiri ahansi y'egi mikono ei baimukize; hariho oburwaire, bamwe omuribo obundi n'emirabanamu y'omu maka, bamwe omuribo emirabanamu ya sente, bamwe omuribo baruhire, obundi bamwe bakagaruka enyima, abamwe n'abasiisi. Eki ekyetengo kiri kyona, Iwe nookiza amaani buri muzigu weena. N'ahabw'ekyo nitushaba, Mukama, ngu-ngu ekiro eki, twetegyereze ngu abazigu baitu, boona, bakasingurwa, nangwa na rufu yo yonka. Kandi ku tusingwire nangwa n'okukiraho omuri Ogwo Owa-Owaatukunzire Akeehayo ahabwaitu, akatwozya omu Shagama Ye.

11 Nitushaba, Mukama, ngu obutaikiriza bwona, okubanganisa kwona, okurabanamu kwona, ebitarikushushana na Ruhanga byona, bituhungye ekiro eki, nikwo Omwoyo Orikwera akore oku yaasiima omu mitima yaitu. Nkaabaasibwa ki Agamba naitwe omu miringo y'omubonano. Nkaabaasibwa ki Agamba naitwe omu Maani Ge. Nkaabaasibwa ki Azoora abo aba-abafiire omu mwoyo, akiza abo abarwaire n'abarikubonabona bagira amagara marungi, ananuura amaju agazingazingirwe, aimutsya emikono eruhire enoganogokire. Ka habeho obwire bw'okwesima.

Nkaabaasibwa ki kibaho ekiro eki, Mukama, turuga omu mwanya ogu tuza omuri Ramada Inn, reero hatandikaho rumwe aha nteerane ezirikukirayo orurabaireho omu rurembo oru. Mukama, obwo tuteeranire hamwe nitushaba! Okagira oti, "Abantu abarikwetererwa Eiziina Ryangye, ku baryeteerana hamwe bakashaba, obwo Ndyahurira niinyema omu Iguru." Ai Ruhanga, nitushaba ngu kibe kityo, ekiro eki.

Hati, Taata, twaba nitushoma Ekigambo, tihariho orikubaasa Kukishoboorora kureka Iwe, Niiwe Oyeshoboororera, kandi nitushaba ngu Otushoboororere ebintu ebi turaashome ekiro eki. Ahakuba nitukishaba omu Iziina rya Yesu. Amiina.

12 Hati baingi omuriimwe ku muraabe nimwenda kuhandiika Ebyahandiikirwe ebi omuheereza arikushoma. Mbwenu nkaayenzire ngu imwe, ekiro eki, ku muraabe nimwenda, mubiikuure omu Baefeso.

Mbaire nimbuurira Sande ehweire aha Baefeso, oku Ekitabo kya Yoshua kiri Abaefeso b'Endagaano eya Ira, kandi oku kiri Ekitabo ky'obucunguzi.

Kandi obucunguzi bwine ebicweka bibiri bitarikushushana: "kuruga omu" "n'okutaaha omu." Okubanza, nooteekwa kurugamu. Abantu bamwe benda kutaahamu n'ensi; kwonka nooteekwa kuruga omu nsi, kugira ngu otaahe omuri Kristo. Nooteekwa kuruga omu butaikiriza, kugira ngu otaahe omu kwikiriza. Tiharikubaasa kubaho ekintu na kimwe omu muhanda gwawe. Kugira okwikiriza kwonyini buzima, nooteekwa kurekyera kimwe enyima, buri kintu ekirikhakanisa Ekigambo kya Ruhanga, kugira ngu otaahe omu kwikiriza.

Kandi ekyo kikaba kiri Ekitabo ky'Abaefeso ky'omu Ndagaano eya Ira, Yoshua. Ahu, Musa yaabaire naajwekyera ebiragiro, ebyabaire bitakaabaasa kujuna omuntu weena; kwonka embabazi zikaba nizibaasa, kandi hanu Yoshua n'ekigambo kimwe nka Yesu, "Yehova-omujuni."

Reero hati, nitureeba ngu twahika aha Baefeso endijo, Abaefeso endijo hati. Ahu, ngu, omu bigombe byaitu by'amadiini g'obwengye bw'obuntu n'ebindi, n'entebeekanisa zaitu zoona z'obwegyese zihikire ahari Yorudani yaazo-yaazo, n'ahabw'ekyo nituteekwa ku-kugira Abaefeso ogundi murundi. Nituteekwa kugira okuruga, "kuruga omu" kandi "n'okutaaha omu," ahabw'Okutwarwa.

13 Hati twaza kushoma ekiro eki omu shuura ya 2 y'Abaefeso. Naaba ningamba ebyo kugira ngu mubiikuure aha-aha mwanya ogwo, nari ngu muze ahari egoy shuura.

Imwe, kandi naimwe akabahindura abahuriire, obu mwabaire mufeereire omu bibi n'omu by'okushiisha byanyu,

Ebi mwabaire mugyenderamu ira nimukuratira emitwarize y'ensi egi, kandi n'okukuratira omukama w'obushoborozi bw'omu mwanya gw'ahaiguru, nigwo mwoyo ogurukorera hati omu batarikuhurira.

Kandi naitwe twena tukaba tubarimu, nitukuratira okurigira okubi kw'emibiri yaitu, nitukora ebi emibiri yaitu n'ebiteekateeko byaitu byetenga; kandi ahabw'obuhangwa bwaitu tukaba turi ab'okugirirwa ekiniga nk'abandi boona.

Kwonka Ruhanga ahabw'okuba omutungi w'embabazi, omu kukunda kwe kwingi oku yaatukunzire,

N'obu twabaire turi abafu omu by'okushiisha byaitu, Akatuhindura abahuriire hamwe Nawe, nimmanyisa, akatuhindura abahuriire hamwe na Kristo, (mukajunwa ahabw'embabazi),

Niinyenda kwiha aho bikye, nari ekicweka ky'ogwo mushororongo, "kwonka Ruhanga," Ruhanga Ahabw'okuba Omutungi w'Embabazi.

14 Niinyenda ngu mureebe hanu ahu nabi, entumwa, nimmanyisa, Paulo, ou-ou, oku yaagambire eki, oku ngu, "Imwe Akabahindura abahuriire, abaabaire muri abafu. Imwe Akabahindura abahuriire, abaabaire muri abafu,

mufereere omu bibi n'omu by'okushiisha byanyu; nimukuratira ebintu by'ensi, ebi omubiri gwetenga, kandi nimukora ebi ebiteekateeko byetenga. Akaba . . . ”

N'enki ekyareetsireho okuhindurwa oku, mwareeba? Kandi n'enki ekyakureetsireho, “okwiha obwire obwo obu mwabaire muri abafu,” mukahindurwa abahuriire? Kuhindurwa abahuriire nikimanyisa “kuheebwa amagara.” Hakabaho okuhindurwa, kuruga omu kufa kuza omu Magara. Tihariho kindi, tihariho ekindi kintu ekyakubaasa kuba aha muntu weena, kikuru kityo, nk'okumuhindura akaruga omu kufa akataaha omu Magara. Omuntu, ku yaakuba naafa, omubiri gwe, hazza akaakizibwa omubiri, ekyo kikaaba ekintu kikuru, kwonka tihariho ekirikukira obukuru nk'obu arikuba affire omu mwoyo haza Ruhanga akamuhindura ohuriire akagira Amagara.

15 “Imwe rimwe, ira, mukaba muri abafu.” Mukaba mufire. Nangwa na baingi hanu eki, obunaku bumwe, nimubaasa kureeba enyima mumanya ku mwabaire mufire. Kwonka hati ahabw'enki mutari abafu eki, nk'oku mwabaire muri obunaku obwo? Mushemereire kuba batsyo, ahabw'okuba mukaba muri abasiisi, “kwonka Ruhanga Ahabw'okuba omutungi w'embabazi.” Nikyo-nikyo ekyo, “Ruhanga Owaabaire ari omutungi.” Ebintu ebi byona ebi twabaire turi, “kwonka Ruhanga”! Ekyo nikyo kyareetsireho okuhindurwa aho honyini, “Ruhanga Ahabw'okuba omutungi w'embabazi”!

Oo, nshemereirwe munonga ahabw'ekyo, ngu We ahabw'okuba omutungi w'embabazi. Kuri Ari omutungi w'empiiha kwonka, kuri Ari omutungi w'ebintu kwonka, hazza Abitungire, kwonka ekintu ekirikukirayo obukuru n'okuba omutungi w'embabazi. Oo, ekyo ka n'ekigambo kikuru, oku ngu rimwe tukaba turi abafu.

16 Kandi tukaba nitubuirira ekiro kiri oku embibo erikuteekwa kufa. Kandi buri kintu ekiri ahari egoo nsigo y'amagara tikirikuteekwa kufa kwonka, kureka n'okujunda. Ku eraabe etajunzire, terikubaasa kuba ehuriire. Kandi okujunda ni, “okuhweraho kimwe; neeba ehweireho.” Kandi okuhitsya obu turaahikye ahu ebigyendererwa byaitu n'okuteekateeka kwaitu birikuheraho kimwe kandi bikajunda bikatuhwamu, obwo nibwo embibo y'amagara erikubaasa kutandika kuba ehuriire.

Hati-hati nitubaasa, nimbaasa kutaasyamu enyegyesa nkye hanu, ku ntari . . . Ku oraabe otarikugikiriza, tikiine nshonga. Ekyo ni kirungi. Nyowe ningikiriza. Niinyikiriza ngu-ngu omuntu, ku azaarwa omu nsi omu, ngu ku orikuba ori omwereere muto, ozairwe omu nsi, tokubaasize kuba hanu kutari okumanya ebintu bitakabaireho kwa Ruhanga, ahabw'okuba Tagira bugarukiro kandi Naamanya ebintu byona. Mbwenu omwereere muto ogwo ku azaarwa omu nsi, haba harimu ekintu omu mwereere ogwo. Ku araabe ari ow'okwija kutunga Amagara, nihaba harimu ekintu kikye omunda omwo, omuri ogwo mwana obwire obwo, eki ahikaho, juba nari bwanyima. Egoo mbibo nkye neeba emurimu. Hati ku oraatware . . . Ebyahandiikirwe nibikigamba butunu.

17 Hati ku oraabe oine Amagara Agatahwaho ekiro eki, ku turaabe twine Amagara Agatahwaho, obwo nikwo tutuura turi, ahabw'okuba hariho omuringo gumwe gwonka gw'Amagara Agatahwaho. Nikwo tutuura turi. Kandi enhonga ahabw'enki turi tutyo, n'ahabw'okuba turi ekicweka kya Ruhanga. Kandi Ruhanga nikyo kintu kyonka Ekitahwaho.

Kandi nk'oku Melekizedeki yaayakiire kimwe kya ikumi kuruga hari Abrahamu, kandi kikabarirwa omwijkuruza we, Leevi, owaabaire akiri omunda ya Abrahamu; akaha kimwe kya ikumi, ahakuba akaba akiri omunda ya Abrahamu obu yaabugana Melekizedeki. Niinyenda kubuirira ahari ekyo omu mwanya ogundi, akasheeshe kamwe. Melekizedeki Ogu N'Oha? Hati mwetegyereze ekyo. Kare munonga, Ruhanga akaba naamanya omwojo ogu orizaarwa. Akaba naamanya byona.

Hati turi ekicweka kya Ruhanga. Nikyo otuura ori. Torikukiijuka, ahabw'okuba okaba ori akacweka omuri Ruhanga kwonka. Okaba ori omu kuteekateeka Kwe kwonka. Eiziina ryawe ryo ryonka, ku riraabe rirabaire mu Kitabo ky'Amagara, rikahandiikwamu ensi etakahangirwe. Akamanya eki oriba.

18 Ningamba eki kwonka, ti kujwanga enyegyesa, kureka okugigorora, kugira ngu tubaase kuruga omuri obu butiini n'obwoba. Torikumanya eki ori. Timurikwija kuba, kureka hati muri abaana ba Ruhanga. Mwareeba, mutuura muri abaana ba Ruhanga. Mwareeba?

Ahakuba obu Ruhanga yaabaire akwine omu kuteekateeka Kwe omu kutandika, nooteekwa kuba, ekicweka kyawee kimwe, Amagara gaawe agari omuriwie hati, nigateekwa kuba gaabaire gari na Ruhanga okwo ira ryon. Mbwenu, We ku, obu Yaabaire atakabaire n'omuntu hanu omu nsi, hatakabaireho ekintu kyona, kureka Ruhanga, okaba ori kimwe aha bicweka Bye. Akamanya eziina ryawe eri oryetwa. Yaamanya erangi y'eishokye eri origira. Yaamanya ebirikubaho byona. Ekintu kyonka ekyabaireho n'obu iwe, ahabw'okuba omusiisi . . .

19 Baangi omuriimwe nimubaasa-nimubaasa kwikirizana naanye aha kiteekateeko eki. Obu waabaire ori omwojo muto, nari omwishi muto, okaba ogyendagyenda aho kandi hakaba habaho ebintu bimwe ebyabaire biba, ebyabaire bitateganisa abandi baana, kikaba kireebeka oti hakaba hariho ekintu omuriwie ekyabaire kigamba munonga. Aho hakaba hariho Ruhanga, kunu waabaire ori omusiisi. Ekyo nimukijuka? [Abateeraine baagira bat, “Amiina.” -Omur.] Buzima. Hati ekyo kikaba kiri ki? Egoye ekaba eri egoye mbibo nkye y'Amagara omuriwie obwire obwo.

Ku haarabireho akaire, waahurira Engiri. Obundi okaza aha kanisa, waakwata eki na kiriya, kandi waaruga omu kigombe ky'ediini waaza omu kindi. Kwonka eizooba rimwe, iwe ahabw'okuba waabaire ori ekicweka kya

Ruhanga, okaba nooteekwa kuba ekicweka ky'Ekigambo. Reero ku waahuriire Ekigambo, waamanya ei waargire, waamanya ngu ago nigo Mazima. Okaba oriwe obwire bwona, embibo ekaba eri omuriwi obwire bwona. Ekigambo kikareeba Ekigambo ekyabaire kiri omuriwi, ekyabaire kiriho ensi etakabaireho, kikareeba Ekigambo reero Waakijaho.

20 Nk'ekitebyo kyangye kikye ky'empungu, oku ako kaana k'empungu kaayaatwirwe enkoko. Kandi ako kaana k'empungu kakaba kagyenda n'enkoko, kwonka ko, enkoko ku yaabaire eyeta, kakaba kateetegyereza okweta kwayo. Kwonka-kwonka obukoko buto obwo, eby'okurya ebi bwabaire burya omu kibuga ky'ekiju, ebyo kakaba katabyetegyereza, oku bwabaire bubiry. Kwonka omuriko hakaba harimu ekintu, ekyabaire nikireebeka kiri eky'omutaano n'oku obwo bukoko bwabaire buri, ahabw'okuba okuruga omu kutandika kakaba kari empungu. Nikwo kiri. Eizooba rimwe nyina ekaija neekasherura, reero, ku kaahuriire okugamba munonga kw'empungu, kukaba kutarikushushana n'okugamba kw'enkoko.

Kandi okwo nikwo kiri aha mwikiriza weena ozairwe obwa kabiri. Noobaasa kuhurira enyegyesa y'ebi'ediini yoona ei orikwenda kuhurira, n'okutaikirizana kwona okutairweho abantu; kwonka ekyo Kigambo ku kishuururuwa aho, obwo habaho ekintu ekyahama, Okyorobera. "Naimwe obu mwabaire mufeereire omu kibi (ago magara) Akabahindura abahuriire." Nihateekwa kuba hariho Amagara agu turikuhindurirwamu abahuriire, okubanza. Ruhanga, ahabw'okumanya ira ebintu bitakabaireho Kwe, akamanya byona. Kandi tukatooranwa ira tutakabaireho kuba batabani na bahara ba Ruhanga. "Naimwe obu mwabaire mufeereire omu kibi n'omu by'okushiisha byanyu, ebi twena twabaire tuygenderamu ira, Akatuhindura abahuriire."

21 Reeba Paulo, obu Paulo yaabaire ari omukugu mukuru omu by'ediini. Kwonka ku yaabugaine ekyo Kigambo amaisho n'amaisho, Yesu, kikamuhindura ohuriire. Yaaba Ohuriire ahonaaho, ahabw'okuba akaba yaatoorainwe kuba atyo. E . . . Akaba ari ekicweka ky'Ekigambo; reero Ekigambo ku kyareebire Ekigambo, bukaba buri obuhangwa bwe. Okweta kw'enkoko kwona, omu makanisa agarikukuratira emigyzenzo, kukaba busha ahariwe; akaba aherize kureeba Ekigambo. Kikaba kiri ekicweka kye. Akaba ari empungu. Akaba atari nkoko; akaba ari omu kibuga ky'ekiju nazo kwonka. Kwonka akaba ari empungu, okubanza kwa byona.

22 Nkahuriraho ekigano kigufu kirikushushana n'ekyo, nyine amatsiko ngu tikiraahuriwe nk'okurogota, aha bikwatiraine n'akaana k'embaata akaayatwirwe enkoko, rimwe. Kakaremwa kwetegyereza. Akantu kakye akarikushetsya, akantu k'omutaano, kwonka kakaremwa kwetegyereza omucuucu n'ebindi byona. Bukaba buzaanira omu mbuga y'ekiju. Kwonka eizooba rimwe egoye nkoko nkuru ekeebembera obwana yaabutwara enyima y'ekyo kiju, reero aki kabaata kaakaga amaizi. Mpaho, kakairuka jubajuba nk'oku kaabaire nikabaasa kaaza omu maizi ago. Ahabw'enki? Kakaba katakazaga omu kidiba. Kakaba katakazaga omu maizi. Kwonka kakaba kari embaata, okubanza kwa byona. Ekintu kyonka eki kaabaire nikateekwa kukora kukaba kuri okwemanya.

Ekyo nikyo kintu eki omwikiriza ari. Hariho ekimurimu, eki, ku abugana Ruhanga amaisho n'amaisho, ayemanya. Egyo mbibo emurimu, ehindurwa ehuriire. Mugyenzi, ekyo nikwo kiri, atyo ayehuuta aruga omu bintu by'ensi. Bihinduka ebifiire ahariwe. Mugyenzi, niinyijuka, oku twena omu magara gaitu ga kare, twatwire omuri ebyo bintu by'ensi. Kwonka ku twakwatsire ekyo Kintu ekirikyo, ekintu ekyatuhindwire abahuriire, embibo nkye eyaagizire Amagara, obwo ebintu byona by'ensi bikajundira aho aho. Tituragarukire kubyetenga.

23 "Ogwo ozairwe Ruhanga, takora kibi. Orikuramya ku aheza kushemezibwa rimwe buzima, tagaruka kwemanyaho ekibi, tagaruka kwetenga kukora ekibi bundi." Eibanja ry'ekibi niriba rihweire. Ohinduka ekicweka kya Ruhanga, omuri Kristo. Kristo akafa kukucungura.

Hati teekateeka kwonka byona ebi twakubaire turi kuri atarabaire Ruhanga. Kwonka Ruhanga, omu mbabazi Ze nyangi, ka Yaatucungwire ekiro eki! Tukaabaire turi nkahi ekiro eki kuri zitarabaire mbabazi nyangi za Ruhanga ahariitwe?

Rimwe ensi ekaba ejuriire kimwe ebibi, abantu bakaba bagireeteire kusiisikara okuhitsya obu Ruhanga yaagwirwe kubi omu mutima akeefuuza eki Yaahangiire omuntu. Omutwe gwona gukaba guri ekironda ekijunzire nikinuuka, omubiri gwona, okuhitsya obu kyagwisize kubi Ruhanga akeefuuza eki Yaahangiire omuntu. N'ahabw'ekyo Akagira ati, "Ndyahwerekyereza abantu abu naahangire." Aryabahwerekyereza ahabw'okuba tibaine oku bari kureka ekibiina ky'abasiisikaire.

Kandi oruganda rw'abantu rwona rukaabaire rwacwekyereziibwe ruhwaho obwire obwo, kwonka Ruhanga, omutungi w'embabazi, akaba atarikubaasa kwikiriza abataine rubanja kuhwerekyerera n'abasiisi. Atyo Yaagyenda yaataho omuhanda ahabw'abo abaabaire nibenda kutaahamu, abaabaire nibenda kukora ebihikire. We, akataho omuhanda gw'embabazi ahari abo abaabaire nibeetenga embabazi, Yaatebeekanisa emeeri. Omu bindi bigambo, Akata amapapa aha mpungu Ze, kugira ngu zibaase kuguruka zikire orubanja, zitarohama n'enkoko. Kwonka A-Akataho omuhanda gw'okuhungiram, omu biro bya Noa. Eki kikatuma Yaakora ekyo, yaagutaho, ahabw'okuba Akaba ari omutungi w'embabazi.

24 Kwonka ku Aheza kuteeraho abantu omuhanda haza bakagwanga, hati, enshonga erikutuma baagwanga n'ahabw'okuba omuribo tiharimu kintu ky'okugwikiriza. Tiharimu kintu ky'okugwikiriza. Maawe akaba akira kugira ati, "Torikubaasa kwiha eshagama omu kitakuri, ahabw'okuba tiharimu shagama omu kitakuri." N'ahabw'ekyo ku haraabe tiharimu mbibo y'Amagara y'Okugwikiriza, obwo Tigurikubaasa kwikirizibwa.

Egyo niyo nshonga Abafarisaayo baabaasize kwemerera omu maisho ga Yesu, Bakamweta, "Belezebuli," ahabw'okuba omuribo hakaba hatarimu eky'Okumwikiriza. "Kandi abu Tata Yampaire boona," nikwo Yaagambire, "baryaija Ahariinye." Aho-hariho omuringo ogu kirikuza kuheebwamu.

25 Obwire bumwe noobaasa kugambira abantu aha nguuto z'omu rurembo, obagambire ebya Mukama, bakushekyerere bwere. Mpaho, tushemereire kukikora, oku biri kwona. Kwonka hurikiza, "Tihariho orikubaasa kwija Ahariinye Tata yaaba atabandize kumwiriza haihi." Ruhanga naateekwa kumwiriza haihi. Nihateekwa kubaho Amagara. "Kandi abu Yampaire boona, baryaija Ahariinye."

Akataho omuhanda ahari abo abarikwenda kucungurwa. Yaataho omuhanda ahari abo abarikwenda kutambirwa. Reero kandi ahabw'okuba Yaakozire eki, Nikimuhindura omutungi w'embabazi, nk'oku Atuura ari omutungi w'embabazi. Nikiteekwa kuba ngu, ku orikwanga Eki, tihariho ekirikuba kitsigaire kureka Orubanja, ahabw'okuba ekibi nikiteekwa kucwerwa orubanja.

Faraho, ku yaagiire omu-omu nyanja, nk'orikutooreza, akateekateeka ngu nave naabaasa kugizamu nka Musa. Musa n'eithe rye, na Faraho n'eithe rye, bombi bakaabaire bashemereire kuhwerekyerera omu nyanja, nikwo kyabaire nikireeba. Kwonka Ruhanga, omutungi w'embabazi, akateeraho Abaheburaayo omuhanda gw'okuhungiram, (ahabw'enki?) ahabw'okuba bakaba bari aha bujunaanizibwa bwabo, bakaba bakuratiire Ekigambo ekyabagambiirwe.

26 Hati ogwo nigwo muhanda gwonka gw'okutungiram embabazi, n'okukuratira obuhabuzi obu Ruhanga atuhaire kugyenderamu. Ogwo nigwo muhanda gwonka ogu Arikubaasa kworekyeramu embabazi, n'obu tukora ebi Yaatugambiire kukora.

Nk'okuhakana kukye okuherize kubaho enshumi nkye ehangwire, n'omuheereza owanjunaine ngu nkaba niinyegyesa Enyegyesa y'entumwa omu biro ebi. Ninteeekateeka ngu nkigambireho ekiro kimwe nari bibiri ebingwire, nari obwire obundi, oku yaagizire ati, "Noogyezaho kutaasyamu, omu busingye obu, Enyegyesa y'entumwa." Yaagira ati, "Obusingye bw'entumwa bukagarukira omu bwire bw'entumwa."

Ntyo naamubuuza nti, "Mbwenu, noikiriza Ekigambo?"

Yaagarukamu ati, "Eego."

Naagira nti, "Okushuururwa 22:18 nihagira, ngu, 'Weena oricwaho Ekigambo kimwe ahari Eki, nari Akakyongyeraho ekigambo kimwe,' ti bigambo bibiri; Ekigambo kimwe, kuwaho Ekigambo kimwe."

Yaagira ati, "Ekyo ninkikiriza."

Naagira nti, "Kyaba kiri kityo nimbaasa kukugambira ahu obusingye bw'entumwa bwatandikiire, obu Emigisha y'entumwa eheebwa Ekanisa; hati naiwe ngambira ahu Ruhanga yaagiihire omu Kanisa, orikujuriza Ekigambo. Tokaabaasa kukikora; tikirih." Naagira nti, "Hati oijukye, ngu Petero, aha izooba rya Pentekoote, niwe owa-owaayanjwire obusingye bw'entumwa. Kandi akabagambira boona ati, 'Mweteise, mubatizibwe omu Iziina rya Yesu Kristo mubone kusaasirwa ebibi byanyu, kandi nimwija kuheebwa ekiconco ky'Omwoyo Orikwera. Ahakuba okuraganisibwa oku n'okwanyu n'okw'abaana baanyu, n'okwa boona abari hare, omuntu weena oryetwa Mukama Ruhanga waitu.'"

27 Hati ku oraabe nooyenda kuhurikiza okugamba kw'enkoko zimwe z'ebigombe by'amadiini, n'okutuura omu bintu by'ensi aheeru enyima okwo, obwo nikyoreka ngu hariho ekishobire. Ahabw'okuba, Ekyo n'Ekigambo. "Weena orikwenda, aije." Mbwenu ku oraabe nooyenda, oshemereire kwija. Kwonka ku oraabe otarikwenda, obwo ori omu mbeera y'obusaasi. Kwonka ku oraabe nooyenda kwija, ija okuratire engyenderwaho ya Ruhanga!

Kandi Taremwa kuhikiiriza eki Yaaraganiise. Nkaba ndi omuto, kwonka hati ndi omugurus, Tinkamureebaga naaremwa omu Kigambo Kye. Ahabw'okuba, byona Naabaasa kubikora kureka okuremw. Tabaasa kuremw. Ruhanga tabaasa. Tikirikubaasika Ruhanga kuremw, haz akguma ari Ruhanga. Ku araaremwe, naaba atariwe.

28 Hati eihe rya Faraho rikagyezaho kutooreza, ahabw'okuba bakaba bateetsirwe kandi bakaba bataine ago Magara. Omu . . . Okuraganisibwa kukaba kutahairwe Faraho. Okuraganisibwa kw'okuza mu nsi eyaaraganisiibwe kukaba kutamuhairwe.

Kandi orikutooreza, ku agyezaho kukuratira omwikiriza kashushu oyeteirwe ekyo, atuma kyashungisibwa kwonka. Ogwo nigwo murabanamu gw'entwaza y'ebigombe by'amadiini gaitu ebiro ebi, n'abantu baingi munonga abarikugyezaho kutooreza Omwoyo Orikwera, abantu baingi munonga abarikugyezaho kutooreza okubatizibwa, abantu baingi munonga abarikugyezaho kutooreza obusingye bw'entumwa. N'ebi'abaikiriza, kandi bo bonka. Ruhanga ateireho omuhanda, omutungi w'embabazi, ngu abaana Be batahwerekyerera. Abateereireho omuhanda.

Hati, Faraho ku yaabaire naagyezaho kubakuratira, akamirwa amaizi ago gonyini agaajunire Musa n'ekibiina kye. Hati, Musa taramizirwe maizi, ahabw'okuba Ruhanga n'omutungi w'embabazi ahari abo abagyendera omu muhanda ogu Ateireho. Amiina.

Nimureeba eki ndikumanyisa? Ngu, ekiro eki, abantu abatarikwikiriza okutamba kwa Ruhanga, abantu abatarikwikiriza okubatizibwa kw'Omwoyo Orikwera, nibabaasa bata kugira eki baatunga? Ruhanga n'omutungi w'embabazi ahari abo Abarikumukuratira; batarikukuratira enyikiriza z'amadiini, kureka abarikukuratira Ruhanga.

29 Ruhanga niwe Kigambo, kandi Akaba omuntu yaatuura naitwe, hati, kugira ngu Abone kworeka ebindi ebiri omuri Ruhanga. Ogwo mubiri, Yesu, gukaba guri omubiri gwa Ruhanga, ekicweka Kye. Musa Akamureeba naarabaho, ekicweka Kye ky'omugongo; tihariho muntu orareebire ahamaisho Ge. Kwonka hati Tukamureeba, Tumureebire, Nitumureeba nk'Ekitambo. Hati, mwareeba, Akaba ari ekicweka kya Ruhanga, ekyorekirwe, Ekigambo. Ekyo nikyo Yaabaire ari.

Kandi omwikiriza weena ku aija ahari Ruhanga, ahinduka ekicweka kya Ruhanga ky'Ekitambo Kye, akoresibwa kworeka Ekigambo ekiraganisiibwe ky'obwire obwo. Mwareeba? Ago n'amazima. Ruhanga, omutungi w'embabazi, takaturekahoga tutaine bujurizi. N'omutungi w'embabazi.

30 Nitumureeba hati ngu Ruhanga akagirira Musa embabazi nyngi okwo omuri egoy nyanja y'omwonyo, okwo omu Nyanja Erikutukura ebiso okwo, nimmanyisa. Bwanyima obu Yaagamba hanu, omu kitabo ky'Okuruga 19:4, Akagira ati, "Nkabatwarira aha mapapa g'empungu, Naabareeta Ahariinye. Nkabatwarira aha mapapa g'empungu, Naabareeta Ahariinye!" Hakaba hariho abandi bantu ahagati y'egoy nyanja okwo, nabo, nibagyezaho kutooreza. Kwonka ngu ki? "Akabatwarira aha mapapa g'empungu."

Hati Ruhanga obutoosha ashushanisa baanabi Be n'empungu. Mbwenu kikaba kiri ki? Musa akaba ari entumwa Ye. Bakaba nibakuratira Musa, kandi ago nigo mapapa g'empungu agu baatwariirweho, ahabw'okuba akaba aine obutumwa bwa Ruhanga. N'abantu bakuratiire obwo. Bakaba bakuratiire Ruhanga obu baabaire nibakuratira Musa n'obutumwa Bwe bw'obucunguzi. Kandi Baiburi neegira ngu, "We, tibaracwekyereire hamwe n'abo abataraikiriize." Habw'okuba, Ruhanga akabagirira embabazi nyngi, ahabw'okuba bakakuratira ebiragiro Bye. Ruhanga naayenda ngu tukuratire ebiragiro Bye.

31 Nitubaasa kugamba ekintu nikyo kimwe ahari Koora n'ahari Dasani n'ekibiina ky'abantu baabo abatarikwikiriza, oku baagyerezeho kutooreza. Bakagyezaho kugira eki bagyema omu ntebeekanisa ya Ruhanga. Bakaba batarikwenda entebeekanisa y'omuntu omwe. Ekyo bakaba batarikukyenda. Bakaba nibateekwa kugira eki baakora. Koora akagira ati, "Ahabw'enki, hariho abandi bantu abarikwera munonga kukukira, Musa. Nootwaza orikushusha oti niiwe wenka orikubaasa . . . nari ngu niiwe wenka obaasiize, nimmanyisa." Atyo yaagira ati, "Ni-ni . . . toshemereire kukora ekyo. Kandi hariho abandi bantu hanu."

Kandi Musa akaba naamanya ngu n'ow'okutwara abo baana akabahitsya omu nsi eyaaraganisiibwe, ahabw'okuba okuraganisibwa niwe kwaheirwe. N'ahabw'ekyo akaba naateekwa kubatwara akabahitsya omu nsi eyaaraganisiibwe.

32 Kandi, ebiro ebi, Omwoyo Orikwera ari hanu kuhamya Ekigambo kya Ruhanga, kandi eryo niryo eipapa ry'empungu eri tushemereire kugyenderaho; ti nyegyesa z'ediini ezigunzirwe abantu. Kureka nituteekwa kugyendera aha mapapa g'empungu, turikuza omu Nsi eyaaraganisiibwe.

Koora akateekateeka ngu hanu bakaba nibaza kutungaho enkoko nyngiho, noomanya, kwija aho, kutooreza egi, egi mpungu. Kandi ku baakikozire, Ruhanga yaagira ati, "Beetaniiseho," atyo Yaamira ensi. Akaabaire yaabamizire boona, ebyo bihangirwe byona, kwonka Ruhanga n'omutungi w'embabazi ahari abo abarikugyezaho kukuratira Ekigambo Kye. Obutoosha, Ruhanga n'omutungi w'embabazi. Baingi omuribo bakaza aha rubaju rwa Musa, Ruhanga yaayashamyenya ensi yaamira abatarikwikiriza. We, ogwo-ogwo otarikwikiriza, naija kuguma naahwerekyerera obutoosha.

33 Abo abataraikiriize, n'obu baraabe baarugireyo bakagyendaho akaire kakye, kwonka, bo, Yesu akagira ati, "Boona, bakafa." Okufa "n'okucwekyereza okamariraho kimwe." Bakafa. Kyo bateekateekyeho. Bakarugayo, baareeba eby'amahano bya Ruhanga, baareeba omukono gwa Ruhanga ogw'amaani, baasemerererwa emaanu; kwonka baagyenda baahurikiza omushaija orikwetwa Balamu, owaakiikamize omuhanda gwa Ruhanga, n'enyegyesa ye erikuhakanisa Ekigambo ngu, "Twena turi eishe-emwe, n'ahabw'ekyo reka twena twegait hamwe."

Egyo n'endijjo ntwaza ya Balamu erikwimuka, ebiro ebi ngu, "Reka twena twegait hamwe." Terikwija kukora. Reka tuyende n'Empungu, Yehova Empungu. Muri abaana b'empungu.

Bashatu bonka nibo baajunirwe omu kibiina ekyo kyona; Musa, Kalebu na Yoshua. Boona abaatsigara bakahwerekyerera omu ihamba; Yesu nikwo yaagambire, omuri Yohaana Orikwera eshuura ya 6. Ruhanga, omu mbabazi Ze, akaba atarikubaasa kubaikiriza kuhwerekyerera, ahabw'okuba, hamwe n'abandi abatarikwikiriza. Boona bakafeera okwo honyini omu ihamba, kandi bakafa. Ruhanga akajuna Musa n'abaikiriza empungu, ahabw'okuba bakaha ekitiinisa Ekigambo Kye.

34 Kandi eriizooba, munywani, oburyo bwonka obu twakubaasa kutungiram obuganzi ahari Ruhanga; Ruhanga n'omutungi w'embabazi, eriizooba, kwonka nituteekwa kuha ekitiinisa eki Yaakigambireho. Torikubaasa kumara agakwata eki omuntu ondijjo yaagambire. Nooteekwa kukwata eki Ruhanga Yaagambire. Akagira ati, "Ekigambo ky'omuntu weena n'ekishuba; kwonka Ekyangye n'amazima."

Eriizooba nitugambirwa ngu, "Eki oshemereire kukora kyonka," omu myanya mungi, "n'okuba memba w'ekanisa, okagira enyikiriza, nari ekintu ekirikushushana nk'ekyo; nari kugamba eshaara, nari kuhandiika eiziina ryawe omu kitabo, nari oshukweho amaizi nari obatizibwe omu muringo nanka, nari ekindi kintu ekiri nk'ekyo. Ngu ekyo kyonka nikyo oshemereire kukora." Kwonka ekyo kigwire.

Kuba empungu ya Ruhanga, nooteekwa kukuratira Ekigambo, buriizooba. Nooteekwa kugumizamu, noorya Ekigambo.

35 Hati nitubareeba, ahanyima y'obwire obu, nibagaruka kwetomboita, okwikiriza kukyendereire omuribo, ahanyima ya Ruhanga kubagirira embabazi. Nitubareeba nibeetomboitera Ruhanga, kandi, ku baayetomboitsire, baitwa okurumwa enjoka. Eego, bakaba bakishemereire. Buzima bakaba bakishemereire. Omuntu weena owaakushobya Ekigambo kya Ruhanga akakora ebintu ebi ebi baakozire, bakaba bashemereire kufa. Boona abaayetengire, bakaba bashemereire kufeera omu ihamba.

Kandi kubaarwariire kimwe okuhitsya obu nangwa dokita Musa hamwe n'abo haabaire hatariho n'omwe owaabaire naabaasa kugira eki yaakikoraho, kandi enkumi n'enkumi bakaba nibafa; kwonka Ruhanga, omutungi w'embabazi, Akataho omuhanda gw'okuhungiramu ababw'abo abaabaire nibaza Kumwikiriza. Akakora omubazi gw'okukiza obwo bushegu, ababw'okuhanika enjoka y'omuringa. Ruhanga omu butungi Bwe . . . Ruhanga akataho omuhanda gw'okuhungiramu nikwo abaana Be abarikwikiriza babaase kukira.

Ruhanga naata omutima aha kintu kyona ekigwire, ekintu kyona eki oinemu amatsiko. Buri rutambo rw'amagara, Ruhanga naakutaho omutima. Ori omwana We, kandi N'omutungi w'embabazi. Naayenda kukukorera.

36 Abo bantu bwanyima bakashiisha, ababw'okutwara ekintu ekkyo nikyo kimwe eki Ruhanga yaabaire abakoreire kuba eky'okurihiirira, egoo njoka y'omuringa, eyaabaire neejwekyera ekibi ekyaherize kucwerwa orurbanja, reero ekkyo kiconco baakihinduramu ekishushani ekirikuramibwa. Kandi ekkyo kyatuma baagaruka baashiisha. "Ruhanga taribagana kitinisa Kye n'omuntu weena." N'ahabw'ekyo, titurikubaasa kugira baaruhangababiri, bashatu, bana. Hariho Ruhanga omwe wenka. Taribagana kitinisa Kye n'ekindi kyona. Ni Ruhanga, wenka, waareeba; nk'oku abakaafiiri baine baaruhangabangi. Twine Ruhanga omwe, kandi Taribagana kitinisa Kye n'ondijo, n'obu kwakuba kwikiriza ekintu kyona kuba ekishushani ekirikuramibwa omu maisho Ge. N'obu Araabe yaakoreire abantu eky'okurihiirira, kandi kikaba kiri Ekigambo kya Ruhanga, kikaba kihikire; kwonka ku bakihindwire ekishushani ekirikuramibwa, obwo baagwa omu kabi.

37 Hati ekkyo nikyo kintu kimwe, ninteekateeka, ekyabaire aha busingye bwaitu bw'ekanisa. Ruhanga akatwoherereza obutumwa bwa Martin Luteeri n'obutumwa bwe, John Wesili, obutumwa bw'Abapentekoote, kwonka tukabukora ki? Ekintu nikyo kimwe eki baakozire egoo njoka y'omuringa, tukabuhinduramu ekishushani ekirikuramibwa, "Ndi memba w'eki, kandi ndi memba wa kiriya." Nooreeba, ori memba w'ekintu kunu otaine buhame bw'amazima obwine akakwate n'okuramya kw'amazima kw'Ekigambo okurimu kutiina Ruhanga.

Hakabaho ki? Baiburi, nitugambirwa omuri Baiburi, ngu, "Nabi akakwata ekkyo kishushani ekirikuramibwa yaakihwerekyereza." Haleluya!

Eki turikwetenga ngu kibeho ebiro ebi ni nabi oraahwerekyereze ekishushani ekirikuramibwa ky'ebigombe by'amadiini, ebitrikuteekateeka ngu nibaza omu Iguru ababw'okuba memba w'enyikiriza nanka nari ekigombe ky'ediini; bishemereire kuhwerekyerezibwa n'okwokibwa, bikanagwa hare. Ruhanga aijwire embabazi. N'omutungi w'embabazi. Omu bwire obu twena twakubaire turi omuri aka katabanguko k'omwrima ebiso okwo, kwonka Ruhanga, omutungi w'embabazi, atwoherereize Omwoyo Orikwera w'amazima, n'Okukyeshoboororera We wenka, hanu hanu omu kyombeko eki buri kiro. Ruhanga, omutungi mu mbabazi Ze, ka tushangire Ari ow'okutangaaza! Eego, sebo.

Hati eki baateekateekire kyonka ngu nibabaasa kukora kukaba kuri okuza aha njoka egi kwonka, nari akantu aka aku Ruhanga yaabaire akozire aho, aku yaatumire Musa yaakora akakanika aha muti, kandi bakaba bakira hatariho bwesigwa bwona. Bakaba beemerera bagireeba kwonka. Batyo baatandika kugihinduramu ekishushani ekirikuramibwa, reero Ruhanga yaayohereza nabi yaaghwerekyereza.

38 Hati, boona abaayangire kureeba ahari egoo njoka omu ihamba, bakahwerekyerera. Hati Ruhanga ataho omuhanda, kwonka ku orikwanga kugureeba, ku oraashutame aha rubaju ruri rw'oruguuto omuri tauni, ku oraaramatire aha nyikiriza nanka haza okanga kureeba omu Kigambo otaireho omutima kureeba yaaba Gari amazima nari gatarigo; boona abaayangire kureeba, bakahwerekyerera. Kandi Ruhanga ni Ruhanga otarikuhinduka na kakye. Mbwenu boona abaayangire kureeba, bakahwerekyerera. Nikwo kiri n'eriizooba, ekintu nikyo kimwe.

Kandi abantu bakashiisha ahanyima, nk'oku baabaire bakora obutwire bwona, ba-baagihinduramu ekishushani ekirikuramibwa, baagikora e-e-e . . . kutunga, nibagyezaho kutambirwa bataine mazima, kandi "bakaba bari baamemba b'ekindi kintu," oku turikukora eriizooba. Kandi hati nitureeba obwire obwo, entaaniso yaakyo, ekaba eri ngu, ogwo Ruhanga . . .

Kikaba kiri eky'okurihiirira kirungi n'akamanyiso karungi k'obwire obwo. Obwire obwo, kikaba kiri kirungi.

Kwonka kikaba kiri eky'obwire obwo bwonka, eky'orugyendo orwo. Ogwo nigwo gwabaire guri omugasho gwakyo gwonka, orwo rugyendo.

39 N'obutumwa obu Martin Luteeri yaareetsire, obw'okwihwaho orubanja, bukaba buri burungi ababw'obusingye bwa Luteeri. Bwagarukira aho.

Okwezibwa kukaba kuri kurungi omu busingye bwa Wesili. Kwagarukira aho.

Bwanyima twataaha omu busingye bw'abapentekoote. Kandi okugarurwa busya kw'ebiconco n'ekintu kirungi munonga, kukaba kuri kurungi omu busingye obwo, kwonka hati ebyo tukabirenga. Ebyo tukabirenga, buzimazima. Ekintu eki nituteekwa kukirenga, ababw'okuba tukikozeise ekintu nikyo kimwe eki baakozire okubanza, tukikoziremu ekishushani ekirikuramibwa. "Ndi memba w'ekibiina eki kyakyo, Ndi memba w'ekibiina kiriya kyakyo."

Ruhanga naaza kwohereza omuntu oraayatagure ekyo kintu akakihindura obusaasingo, atyo ahamye Ekigambo Kye, Ekigambo ekiwire. Yetegyereze. Ruhanga asiimwe! Hati nitureeba ngu ago n'amazima. Ruhanga, omutungi omu mbabazi Ze!

40 Reero nabi ku yaakihwerekyereize, bakatsigara bataine akamanyiso koona k'okutambirwa, k'okurihiirirwa, ababw'okuba ekishushani kyabo kikaba kihwerekyereziibwe. Kwonka Ruhanga, omutungi w'embabazi, akabakorera ekindi. Kandi akakora ki, ekyo? Akaba abiza amaizi aha kiyanja ky'ahari hekalu, kandi baingi bakaba baija bakira, ababw'okuza omu maizi aga. Yesu akashuumma aha kiyanja eki, yaareeba omushaija owaabaire amazire emyaka mingi abyami aho, ategyereize amaizi kubira. Nooreeba Ruhanga, omutungi w'embabazi! N'obu baraabe baahhindwire ekyo kintu ekishushani ekirikuramibwa, n'obu kiraabe kyayetaagiise nabi kukishenyagura, Ruhanga akabateeraho ogundi muhanda, 'habw'okuba n'Omutungi w'embabazi. Naayenda ngu bakire, n'ahabw'ekyo Akabateeraho omuhanda gw'okutambirwa.

Hati, kandi ekyo kikagumizamu, ensi yaagumizamu neebeera kimwe ey'ebibi, neeyeyongyera obwire bwona. Aha muheru ensi ekabeera kimwe ey'ebibi okuhitsya obu Ruhanga yaabaire naabaasa kugihwerekyereza, Akagira omuri Malaki 4, "ngu Ntakaija nkaitsa ensi omukyeeno." Akaakikozire; hatariho kubanganisa.

41 Kwonka kandi Ruhanga, omutungi w'embabazi, Akoohereza Omujuni, Yesu Kristo. Akoohereza Yesu kuba byombi Omujuni kandi omutambi. Ahakuba Akagira ati, "Nk'oku Musa yaahanikire enjoja y'omuringa omu ihamba, n'Omwna w'omuntu nikwo arikuteekwa kuhanikwa," ababw'ekigyendererwa ekyo kimwe. We, eky'okurihiirira, ogwo niwe twineho obugabe, tihariho kindi kureka eky'okurihiirira ekyo. Eki Yesu yaaguzire n'Eshagama Ye, ekyo nikyo twineho obugabe. Kandi Baiburi neegira ngu, "Akahutaazibwa ababw'eb'yokushiisha byaitu, Yaahondahondwa ababw'okutahikiirira kwaitu, okuteerwa kw'okutureetera obusingye niwe Yaakuteirwe; kandi emihihirizi Ye niyo yaatukirize." Ekyo nikyo turikubaasa kugiraho obugabe, ababw'okuba okwo nikwo kurihiirirwa oku twineho amatsiko, okwatuteereirweho. Ruhanga, omutungi w'embabazi!

Oku kukaba nikuza kuba okurihiirira Okutarihwaho, ababw'okuba Akaizira Wenka. Ruhanga akajia We wenka, omu nshusha y'omubiri gw'ekibi, kuba o-o-o-okurihiirira Okutarihwaho; yaabonabonesibwa omu mubiri, atyo yaaba eky'okurihiirira; bwanyima yaagaruka omu nshusha y'Omwoyo Orikwera, kuhamya okwo kurihiirira. Ahu enjoja y'omuringa nari amaizi agarikubira byabaire bitarikubaasa kukikora, byona bikaba nibyoreka Eky'okurihiirira ekyo ekihihiiri. Ruhanga, omutungi omu mbabazi Ze, akakora eki.

42 Hati, eriizooba, omu biro ebi tutwiremu, turabire omu busingye obu bw'ekanisa kandi twashoboorora gye buri kintu ahari Ekyo. Abakugu omu by'ediini bagyenzi baitu b'ebiro ebi bakahabira hare munonga Baakurugaho. Kwona Nibakushoboorora kubi, bakuta omu bwire obundi, omu busingye obundi, omu kintu ekindi, ira munonga, obwire bwingi obwahingwire. Kandi okutamba kwa Ruhanga kukaba kuri nk'okuhwereireho kimwe, kikaba kigumire kubona omuntu owaabaire naakwikiriza. Bakaba bakushekyaerera. Nangwa n'omu myaka etarikuilingura nka makumi abiri ehangwire, bakaba nibashungisa okutamba kwa Ruhanga. Abapentekoote bakaba baakurugiireho kimwe. Bakatandika nakwo omu biro by'okubanza, bwanyima baakurugaho.

Reeba oku baakozire. Hati bakagwa iraro ry'ebigombe by'amadiini, buri omwe nairukira kukora enyikiriza y'ediini, n'ebindi. Kureka, omu mwanya gw'okwakiira Omushana, nk'oku Omushana gwabaire nigwija; bakeekoram u ebibiina batyo baayegunzira enyikiriza z'ediini, buri omwe naija, naayekorera enyegyesa kandi naagigumamu. Kandi bakahabira kimwe okuhitsya obu Omwoyo Orikwera yaabaire atakibaasa kutaaha omu kanisa. Bakahinduka ekishushani ekindi ekirikuramibwa nk'enjoka y'omuringa, kukaba o-okuramya ebishushani. Buri mutu akagira ati, "Nyowe ndi memba w'egi, kandi ndi memba w'eriyia." Kukaba kuri okuramya ebishushani. Ka n'omuzambaaro ogu turimu, omu bwire bw'aha muheru.

Kwonka Ruhanga, omutungi omu mbabazi Ze, atwoherereize Omwoyo Orikwera, kandi naahamya Ekigambo Kye ekiro eki nk'oku yaaraganiise ngu Aryakora. Ruhanga akaraganissa ngu Aryakora ebintu ebi. Reeba ebi Yaakozire!

43 Reeba eki Yaakozire, oku hati turikubaasa kureeba oku Yaaraganiise buri busingye ekintu nanka kubaho. Kandi nitushanga ngu kikabaho kityo buzima, nk'oku Yaagambire ngu Aryakora, ababw'okuba n'Omutungi omu mbabazi Ze, obutoosha agira embabazi kuhikiiriza buri Kigambo eki Yaaraganiise. Naateekwa kukikora, kandi

obutoosha, kugira ngu agume ari Ruhanga. Obutoosha eki Akikora, Ekigambo Kye obutoosha kihikiirira omu bwire Bwakyo. Embibo Ye ei Yaabibire omu nsi. Akakora ki? Akagita hanu omu Kigambo, kandi ego n'embibo. Kandi buri kaire ku obusingye bubaho, ego mbibo ehiisa, reero habaho okuhunduza. Akakiraganisa, kandi nikwo kiba.

Hati tukaba tutashemereire ebintu ebi. Tukaba tutashemereire egi migisha ya Ruhanga, ahabw'okuba tukaba tukuratiire ebintu by'ensi, nitutoora omu buhabe bwa Kaini. Kaini, akombeka eitambiro rirungi n'ekanisa nungi, yaaritaho ebimuri, yaateekateeka ngu okwo buzima nikwo kyabaire kiri, ngu "Gukaba guri omutsitsa gwa za apo nari ebijuma bya pear, nari amakomamahanga, nari eki kyabaire kiri kyona," eki ishe na nyina baariire omu kibanja kya Edeni, ekyatumire baabingwamu. N'ahabw'ekyo yaabihongyera Ruhanga, kwonka Ruhanga yaabyanga.

44 "Kwonka Abeeli ahabw'okwikiriza akahayo ekitambo ekirikusiimwa ahari Ruhanga okukira ekya Kaini."

Kandi, ebiro ebi, Baiburi omu kitabo kya Yuda neegira ngu, "Bakatoora omuhanda gwa Kaini; baacwekyererera omu bugomi bwa Koora." Waareeba, "bakatoora omuhanda gwa Kaini," gw'okwombeka amatambiro, kwombeka amakanisa, ebigombe by'amadiini, bakabihunda ebimuri, bikaba bihang, baamemba baangi okukira agandi; nibaakiira ebintu, omuntu weena orikwija akagurukyeera, nari akakwata omu ngaro, nari akabatizibwa omu muringo nanka, nari akagamba omu ndimi, nari akairuka omu kishengye, nibahandiika amaziina gaabo mu kitabo. Ago n'amazima. Kwonka bwanyima bangira kimwe Amazima gonyini agarikubuuirirwa, Bageehakana. Nikibaasa kita kuba kityo? Yetegyereze omuzambaaro ogu twabaire turimu! Yetegyereze.

Kandi Baiburi neegira ngu, "Bakatoora omuhanda gwa Balamu, kandi baacwekyererera omu bugomi bwa Koora." Baacwekyererera omu bugomi! Obugomi bwa Koora bukaba buri buuha? "Ahabw'enki, nooteekateeka ngu niiwe orikwera wenka? Ahabw'enki, aba Ruhanga . . . Twena turi abarikwera. Ekanisa yoona nikwo eri. Buri . . . Twena tweshorooreze hamwe, ekyo nikyo tushemereire kukora." Aho niho baacwekyererere, omuri ekyo. Kandi buzima tukaba tukishemereire. Tukaba tushemereire kuba tutyo.

Kwonka Ruhanga, omutungi w'embabazi, atukurwire yaatwiha omuri ogwo muzambaaro yaatwikiriza kukireeba ekyo kintu kitakahikire hanu. Omutungi w'embabazi, atwoherereize okusisiimuka kw'okutamba kwa Ruhanga, hamwe n'okugaruka ogundi murundi kw'Amaani ga Ruhanga. Okurugiirira omu byafaayo, tihariho okusisiimuka okurarengize emyaka eshatu. Okusisiimuka oku kumazire emyaka ikumi na itaano, kubaire omuriro ogurikwaka, kubuga ensi yoona. Ahabw'enki, ahabw'okuba tukaba tukishemereire? Ruhanga, omutungi w'embabazi, t'ahabw'okuba ngu tukaba nitukyetenga nari ngu ahabw'okuba tukaba tukishemereire, nimmanyisa. Kyo teekateeka eki kukozire!

45 Nintekateeka ahari omwe aha b'eishe-emwekaza bagyenzi baanyu hanu omuri Phoenix, ou baingi omuriimwe murikumanya, Muky. Hattie Waldrop, akaba arwaire ekookoro y'omu mutima. Kandi akaba ari omu runyiriri rw'ab'okushabirwa eruguru hanu obu nyowe n'Of'eishe-emwe Moore twabaire turi hanu omurundi gw'okubanza, nk'emyaka ikumi na itaano, ikumi na munaana ehwiringe. Kandi akaba naafa, naitwa ekookoro y'omutima, kandi akaabaire yaafire kare munonga. Kwonka Ruhanga, omutungi w'embabazi, akamwoherezaho Amaani Ge. Atyo Yaakiza amagara ge, kandi ariho eriizooba. Ruhanga omutungi w'embabazi!

Omunyeishengyero Upshaw, omushaija w'amaani. Nintekateeka akaba ari purezidenti, nari ekindi kintu, w'a-w'Ababaputisiti, Southern Baptist Convention, obwire bumwe, nari omuhwezi wa purezidenti nari ekindi kintu. Akaba akozire byona. Akaba ari omushaija murungi. Akakora byona ebi yaabaire naamanya kukora. Akaba yaagiire ahari dokita weena. Tihariho n'omwe owaabaasize kumuhwera. Akaba ataruga ahansi. Abaheereza bakaba baamushabiire. Akaba yaashukirweho egarani y'amajuta aha mutwe, amajuta g'okushukwaho, gamushukirweho abaheereza abatarikushushana hoona hoona.

46 Ekiro kimwe, omuri Los Angeles, California, ku naabaire ninza aha kituuti, naanaga amaisho aha bugaari bw'abarema abarikukira abashutami hanu obwingi nka kabiri, nari kashatu, bari hoonahoona omu tuhanda tw'ahagati y'entebe, enyima n'omu maisho. Reero aho hakaba hariho engozi erimu akaishiki k'akairaguju, akaishiki k'eshagama y'Abairaguju, kandi nyina-nyina akaba ashutami aha rubaju rwako. Kandi murumuna wangye akaba naatebeekanisa orunyiriri rw'ab'okushabira.

Kandi nkaba nindeeba, ntarikumanya ekyabaire nikigyenda omu maisho. Ntyo naareeba dokita, ajwaire gaarubindi mpango, naashemeza akaishiki k'akairaguju endwara y'aha mumiro, reero kaashanyarara. Ntyo naareeba oku n'oku, naateekateeka nti, "Ogu mwana ari nkahi?" Tinaabaasa kumureeba.

Ahanyima y'akaanya kakye, hansi aho, hatariho matsiko, akaishiki karungi k'emyaka nka mushanju nari munaana y'obukuru, akaabaire nikaza kushanyarara ebiro by'amagara gaako byona. Kandi aho hakaba hariho nyina ari aha maju ge, naashaba. Ntyo naagira nti, "Dokita ogu akashemeza akaishiki kaawe," reero naashoboerora.

Yaagira ati, "Ago n'amazima, sebo."

Reero yaagyezaho kureeta ogwo mwana aha kituuti. Baamugambira ngu atakikora. Baagyezaho kumuhuumuriza. Ku baamazire kumuhuumuriza, naateekateeka nti, "Mpaho, nituza kutunga omugisha

gw'okumushabira." Omu dakiika nkye . . . Obundi hariho abantu hanu abaabaire bariyo ekiro ekyo.

Kandi nkaba nindeeba okwo omu bateeraine, naareeba ako kaishiki nikashuma, nikaraba aharikushusha nk'a-nk'akahanda kafunzire, kaine eky'okuzaanisa ekikozirwe nk'omwerefere omu mikono yaako, nikakizaanisa. N'obu dokita yaakugambire ata ngu nikaza kushanyarara ebiro by'amagara gaako byona; Ruhanga, omutungi w'embabazi, akoohereza Omwoyo Orikwera, n'okworekwa, reero akaishiki ako kaimukaho, ko na nyina baakwatana omu ngaro baaraba omu kahanda ako ka rwagati y'entebe, nibahimbisa Ruhanga.

47 Enyima okwo hare hakaba hashutamiyo omugurusi, Omunyeishengyero Upshaw, baingi omuriimwe nimumanya obujurizi bwe. Akaba ari omuntu murungi, akaba agyerizeho ebiro by'amagara ge byona, emyaka makumi mukaaga na mukaaga ari ekirema omu kagaari k'abarema, naasindikwa ari omu katanda; n'ebikoni by'ebimuga bitarikumuruga mu maahwa, ebi yaabaire agyenda nabyo, atarigaruka kugyenda kurungi bundi. Mbwenu akaba ashutami aho, naareeba ekyo. Reero ahonaaho, nkaimutsya amaisho naareeba okworekwa. Ngugu yaija, naagyendera ahaiguru y'abateeraine abo, ainikire omutwe gwe, akaba naabaasa kugyenda kurungi nk'ondijo weena. Nkaba ntarikumanya omushaija ogwo.

Naagira nti, "Hariho omushaija w'amaani oshutami enyima kuri. Akahanuka aka kigaari obu yaabaire ari omwojo muto, yaagwa aha kyoma eki baboheraho obunyaatsi bw'ente, yaahendeka omugongo. Bakarima obwina omu nju ahansi, kuzibira okutengyeta kushasha omugongo gwe, abantu ku baabaire baribata." Naagira nti, "Yaaba omuntu w'amaani, kandi yaagumizamu naaba ow'amaani munonga. Ashutami omu rukiiko rukuru Omuka ya purezidenti wa Amerika."

Reero omushaija ogu yaija yangambira, yaagira ati, "Ogwo n'Omunyeishengyero Upshaw. Oramuhuriireho?"

Naagira nti, "Tinkamuhurirahoga."

Atyo yaatwara omuzindaaro mukye enyima okwo kugira ngu babaase kugamba hamwe.

48 Reero naatandika kureeba oku n'oku, naareeba ogwo mugurusi Omunyeishengyero naija, naaribata naija ahi ndi, omu kworekwa, arigye buzima nk'oku yaakubaire. Ruhanga, omutungi w'embabazi, akamwimutsya yaamwiha omuri ako kagaari k'abarema, yaagyenda ataine bikoni okuhitsya ahu yaafeereire. Ruhanga omutungi w'embabazi! Baadokita ku baaremire, sayansa ku yaaremire, buri kintu kyona ku kyaremire, Ruhanga akaba omutungi w'embabazi aha Munyeishengyero Upshaw.

Niinyeteekateekaho. Obu naabaire ndi omwojo mukye okuzire, niinyijuka oku . . . Abantu ebiro ebi baanyeta, "orikwanga abakazi." Enshonga ahabw'enki kyabaire kityo, n'ahabw'okuba naareebire emicwe mibi mingi y'abakazi obu naabaire ndi omwana. Nkabanga. Kwonka tindikukikora hati, ahabw'okuba nimmanya ngu hariho bamwe barungi. Kwonka niinyijuka oku baabaire nibatwaza kubi munonga, baine emicwe mibi munonga. Kandi nkaba nteekateeka nti, "Mugyenzi, ti-tindiza ahu abantu bari. Tiinyine bwegyese, n'ahabw'ekyo tindikureeba ou nditwara."

49 Obwo nshutami aho ndi akaana kakye, ntajwaire n'esaati, nyine ekooti yangye etsibirwe nka bat, n'ekikwatsi, kandi obwo hariho ekibiga kingi munonga. Reero omwegyesa yambuuza ati, "William, toine kibiga n'ekyo kikooti eki ojwaire?"

Naagira nti, "Ngaaha, nyabo, nyine embeho." Atyo yangambira kuza aha kyoto, reero yaata omu kyoto ezindi nku, ekibiga kyayenda kuunyita. Kandi omuri obwo bunaku bwona nka-nkaba ntaine saati.

Ntyo naateekateeka nti, "Ku nditunga empiihia, obundi nkagiraho nkye, ndyayegurira embundu nungi," nyije Burengyerwa-izooba kunu ntyo ntuure kunu mbe omuhii, amagara gangye goona. Nkaba ntarikwenda kugira akakwate n'abantu. Mbagume hare, ahabw'okuba bakaba nibanyanga, n'a-n'ahabw'ekyo nkaba niinyenda kubaza hare.

Reero buri kaire ku naabaire nza omu tauni rwagati, kugira ou naagamba nawe, naareeba abantu bamwe aha ruguuto rw'omu rurembo abu naabaire nimmanya. Ngira nti, "Yeiwe, Yohaana, Jim! Ori ota?"

"Oo, yeiwe."

Nooreeba, bakaba batenda kugamba naanye, bakaba batenda kugira akakwate naanye, ahabwa tata n'abandi abaabaire bakora wisiki. Kunu nyowe-nyowe ago maarwa naabaire ntagakora. Tikugira ngu haine eki naakozire. Kandi nkaabaire nimba omuntu w'omuringo ogwo.

50 Kwonka hati nkagambira omukazi wangye, enshumi nkye ehangwire nti, "Ekisiika kyangye kijjwireho embundu ezirikukirayo oburungi ezirikubaasa kugurwa." Oo, nintekateeka ahari ebyo bijwaro bikuzire ebirofa. Ekiro eki nyine shuuti ibiri nari ishatu nungi. Ngu tiinyine banywani? Nikiinyetaagisa kweshereka okwo omu ihamba, ahabw'abantu kuba baingi munonga. Ahabw'enki kyabaire kityo, n'ahabw'emitwarize yangye mirungi, n'ahabw'obwegyese bwangye? Ngaaha. Ruhanga, omutungi w'embabazi, akandeeba ndi omu mbeera egoy Yanjuna.

Niinyijuka ndikwebemberwa obwo bankwatsire emikono, nk'empumi. Nkaba ntarikubaasa kureeba. Buri

kintu omu maisho gangye kikaba kiri oruho; ndi ow'okuba empumi amagara gangye goona. Kwonka Ruhanga, omutungi w'embabazi, akangarurira okuhweza kwangye. Nyine emyaka makumi ataano na itaano y'obukuru, kandi ninkihweza kurungi. Ruhanga, omutungi w'embabazi, nikyo kintu kyonka eki ndikubaasa kugamba.

51 Rimwe ekanisa ekaba etaine omuhanda ogutairweho gw'okutambirwa. Bakaba bagwine, kwonka baagwanga. Kwonka Ruhanga, omutungi w'embabazi, aboohereereize ekiconco ky'okutamba kwa Ruhanga. Ogwo n'Omwoyo Orikwera ori ahagati yaitu, naahamya Ekigambo n'obumanyiso oburikukikomookaho. Ruhanga omutungi w'embabazi!

Nyine empapura ibiri nari ishatu hanu z'ebi mpandiikire, kwonka tindikuza kugyezaho kubikwataho, ahabw'okuba ni-nindeebea ngu haihi obwire bwahikire bw'okutandika orunyiriri rw'ab'okushabirwa. Kwonka Ruhanga omutungi w'embabazi!

Abaingi omuriimwe hanu eki, baadokita bakabahwa amatsiko. Hariho abantu abashutami omuri obwo bugaari bw'abarema, obundi abatariburugamu. N'ab'okubugumamu. Bamwe omuribo, bashanyareire omu miringo etarikushushana, bo (tibakaabaasize na kakye) tibakaabaasize kuburugamu, tihariho muhanda gwona oku baakuburugamu. Kwonka Ruhanga, omutungi omu mbabazi Ze, ataireho eky'okurihiirira. Reka kukyanga. Kyakiire. Hariho abantu aho abarware omutima, hariho abantu abaine ekookoro ezi baadokita batakaatamba. Timwine matsiko, timwine kihwera, omu nsi egi.

52 Kwonka Ruhanga omutungi w'embabazi, ayohereize Omwoyo Orikwera, kandi ari hanu honyini hati kuhamya Ekigambo, kuhamya ngu Tahinduka; oku abaire ari nyomwabazyo n'eriizooba nikwo ari, kandi nikwo ariguma ebiro byona. Ahabw'okuba tukishemereire? Ahabw'okuba Ruhanga n'omutungi w'embabazi! Amiina. Hati niwe Ogwo, niwe ogwo Muntu, Ni Mukama Yesu ogwo. Tafiiire, kureka Akazooka omu bafu, kandi n'Ohuriire ebiro byona.

Tahinduka; oku abaire ari nyomwabazyo n'eriizooba nikwo ari, kandi nikwo ariguma ebiro byona, Akiri omutungi w'embabazi nk'obu Yaazigiriire ogwo mukazi owaabaire arwaire ekyejwiso. Kandi ogwo mukazi akaraba omu mutwe gw'abantu. Amatsiko ahariwe gakaba gaahweire, baadokita bakaba baakozire kyona eki baabaire nibabaasa. Akaba arwaire ekyejwiso. Akaba arikufa. Reero yaakwata aha kijwaro ky'Omwegyesa. Ruhanga, omutungi w'embabazi, yaahinduka yaamugambira enaku ye. Atyo yaakira ekyejwiso eki.

Maraaya muto kashushu akaza aha iziba eizooba rimwe, kutaha amaizi. Ataine matsiko. Akaba yaabingirwe omu baishiki abashugaine, n'okuza omu bantu, amagara ge gakaba gatari marungi. Akateekateeka ati, "Nikigashaki kugyezaho? Bakaanyanga, tihakirih burungi obu ndikusherura." Kwonka akaranzya, aha rubaju orundi rw'eiziba hakaba heemereireho, nimmanyisa hakaba hashutamijo Omushaija Owaamugambiire ebintu byona ebi yaarakozire, Ruhanga omutungi w'embabazi.

Ruhanga ogwo omwe, ekiro eki, akiri omutungi w'embabazi, nk'oku Yaabaire ari omu biro ebyo. Ruhanga omutungi. [Eticweka ky'orutambi rw'amaraka ekirihobu busha-Omur.]

53 Nintekateeka twine kaada z'ab'okushabirwa magana abiri ezigabirwe hanu, nari abu twetsire magana abiri. Twaza kubeta reero abo bantu bateere orunyiriri. Twaza kubashabira.

Kwonka tutakakikozire, ku haakuba hariho abagyenyi hanu, barekye kuteekateeka na kakye ngu egi n'emigyerek. Egi ti migyerek. N'okworekwa kw'okuraganisa kwa Ruhanga. Nikirugiirira aha ki otaireho amaisho. Tihariho omuntu weena oine amaani. Tihariho omuntu oine okubaasa, kwonka itwe nk'abaikiriza twine obushoboorozi; ti maani, kureka obushoboorozi.

Omuntu omwe akambuuza enshumi nkye ehweire, ati, "Ow'eishe-emwe Branham, noikiriza ngu oine amaani g'okukora ebi?"

Naamugarukamu nti, "Tiinyine maani, na kakye, kureka nyine obushoboorozi." Buri mwikiriza abwine. Ku oraabwangye, nooguma ah'ori. Kwonka ku oraabwikirize, nibuza kukora ebikuru munonga, ahabw'okuba Ruhanga n'omutungi w'embabazi.

54 Reebera aha muporiisi mukye oyemereire aho aha ruguuto rw'omu rurembo, ebijwaro bye naabireberamu, ni mukye munonga. Enkofiira eshwekire amatu ge. Kwonka yaaza aheeru aho ahu emotoka zirkwija niziraba omu ruguuto orwo, niziiruka embiro ya mailo makumi ataano omu shaaha emwe, ez'amaani agarikwingana ag'embaraasi magana ashatu. Taine maani g'okwemereza n'egaari. Nikwo kiri. Kwonka k'ateere egoy furembe reero aimutsye ogwo mukono, haza orebe zaabureeki nizinwigiira. Taine maani, kwonka aine obushoboorozi. Orurembo rwona nirumushagika.

Kandi ku omushaija nari omukazi, tindikufayo ni mbeera ki ei orimu, oine obushoboorozi bwa Ruhanga, ahabw'okuraganisibwa, ahabw'okuba n'Omumutungi kandi akaraganisa kukora bingi munonga munonga. "Ku origambira orushozi oru oti, 'tsinduka,' haza otarikubanganisa mu mutima gwawe, kureka okaikiriza ngu eki waagamba nikija kubakwo, oryakikorerwa." Toine maani, kureka oine obushoboorozi.

Mwijukye obu Yangambira emyaka mingi ehweire, ati, "Noija kushuurura enaama z'omu mitima." Ahakuba

We . . . Ekyo nimukijuka, baingi omuriimwe abantu ba Phoenix? Akakiraganisa. Eki Araganisa, Akihikiiriza.

55 Hati hariho bamwe omuriimwe hanu abataine kaada z'ab'okushabirwa, tihariho kubanganisa. Ni bangahi abarwaire kandi bataine kaada z'ab'okushabirwa, mwimutsye emikono yaanyu? Buzima. Kare. Ku muraabe nimwenda kumanya, ti bushoborozi . . . ti maani, kureka obushoborozi bw'Ekigambo, "Ebintu ebi Nkora, naimwe muryabikora."

Yesu akaraganisa omuri Luka 17:30, ngu ku hariba hatsigaireho akaire kakye Akaija, haryabaho obwire nk'obwa Musa . . . nimmanyisa Noa, "Obu baabaire nibarya, nibanywa, kandi nibahingira; kandi tibarakimanyire okuhitsya aha kiro eki Noa yaataahiire omu meeri." Akagira ngu obwire obwo buryabaho. Kandi nabwo Akagira ati, "Nk'oku kyabaire omu biro bya Looti," reero yaagira ati, "eki kiryabaho aha kiro ekyo eki Omwana w'omuntu arishuuruurirwaho, Omwana w'omuntu ku arishuuruurwa omu biro by'aha muheru."

56 Hati reeba eki We, oku Omwana w'omuntu Yaayeshuurwire omu buntu bwa Maraika ogu, owaabaire ari Omwana w'omuntu. Buzima. Abrahamu Akamweta, "Elohim." Akaba ari Omwana w'omuntu, Owaayeshuurwire ensi y'Abanyamahanga etakookiibwe. Akakikora ata? Aha mwikiriza. Ahari ogwo orikwehindura omwikiriza, Akooherezayo ababuurizi babiri kubabuurira. Kwonka aha mwikiriza kashushu, Akeemerera ateire eihema amabega, yaagira ati, "Abrahamu," Akaba ari Abramu ekiro . . . ebiro bikye enyimaho, kitakabaireho. Kwonka hati ni Abrahamu. "Saara, omukazi waawe arahi?"

Yaagarukamu ati, "Ari omu ihema, enyima Yaawe."

Yaagira ati, "Ninza kuhikiiriza okuraganisa Kwangye ahariiwe. Ninza kukutaayaayira."

Oo, Abrahamu akaba aine emyaka igana y'obukuru, Saara akaba aine makumi mwenda; kwonka Ruhanga, omutungi w'embabazi, akahikiiriza okuraganisa Kwe. Kikarugamu omwana, 'habw'okuba Ruhanga n'omunyambabazi, kandi Aijwire embabazi. N'omutungi w'embabazi. Ahikiiriza okuraganisa Kwe.

57 Yetegyereze, obwo Ateire eihema amabega, Saara akasheka yaagira ati, "Ebintu ebi nibibaasika bita? Naakaikwire. Nimbaasa nta kushemererwa n'omushaija wangye, nk'omukazi muto oshweirwe? Ahabw'enki, aine emyaka igana y'obukuru. Okumanyana kwaitu kw'omukazi n'omushaija kukahwaho, emyaka mingi, mingi echingwire. Eki nikibaasika kita?" Atyo yaakishekeryera.

Kandi Maraika ogwo n'o . . . Omwana w'omuntu Ateire e-eihema amabega, yaagira ati, "N'enki ekyashetsya Saara, akagira ati, 'Ebintu ebi nibibaasika bita?'"

Kikaba kiri ki? Yesu akagamba, omuri Luka Orikwera 17:30, ngu, "Omu biro nk'oku kyabaire omu biro bya Looti," embeera niyo emwe, ensi y'Abanyamahanga etakookiibwe, Akagira ati, "Omwana w'omuntu Aryayeshuuura aha kiro ekyo." Akaraganisa, ngu nk'oku Malaki 4 yaaturaganiise kiryahikiirira. Obutumwa buryaija oburigarura abantu aha Butumwa obwabandize bwa pentekoote, hamwe n'emigisha niyo emwe ei baabaire baine aha izooba rya . . . Niki? N'empungu y'amapapa abiri, gombi Endagaano Ensyu n'eya Ira, neepapariza hamwe okuraganisa kwayo, kwa Ruhanga, kuhikiiriza eki okuraganisa kwa Baiburi kwagambire ngu kuryakora. Amiina.

58 Ruhanga, omutungi w'embabazi, takurekire abantu Be bakataaha omuri ebi bigombe by'amadiini, "ebitungire ebintu bingi by'ensi egi," Obusingye bw'Ekanisa ya Laodikea, kureka Akaba naaza kutaho obuhungiro. Bantu 'mwe, mubwikirize. Ruhanga abahe omugisha. Amiina. Ruhanga omutungi w'embabazi! Embabazi za Ruhanga, ekyo nikyo kintu kyonka eki ndikwetenga. Ti kuhikiirira Kwe, ti biragiro Bye; kureka embabazi Ze nizo ndikushaba. Ruhanga angirire embabazi. Twena nitwehurira tutyo.

Mbaire nindeeba. Hariho omukazi mukye oshutami aho aha muheru gw'entebe. Oine kaada y'ab'okushabirwa aho, mukazi 'we? Togiine. Ka mboorekye oku Ruhanga ari omutungi w'embabazi. Otwire nooyekanga munonga enshumi nkye echingwire, tikwo? Ori kubi munonga, kandi amaisho gaawe garembire. Tikwo kiri? Nikwo kiri. Hati byaza kuhinduka. Ruhanga, omutungi w'embabazi, eki ku oraakiikirize. Hati toine kaada y'ab'okushabirwa, toine kintu kyona; kandi torikugyetenga. Waareeba, n'embabazi ezi waagirirwa.

59 Aho hashutamihi omuntu mukye munonga ashutami aho honyini omu maisho, aine nka . . . ashutami aho aho. Arwaire ekizimba aha mubiri gwe. Niho kiherize kumwijaho, obunaku bukye obuhingwire. Tikwo, sebo? Nikwo kiri. Torikumanya eki kiri. Okitiinire. Ago n'amazima. Kikareetwa obuhuta, tikwo? Oine kaada y'ab'okushabirwa? Toine kaada y'ab'okushabirwa. Torikugyetenga. Ruhanga omutungi w'embabazi.

Oo, ow'eishe-emwe, ow'eishe-emwekaza, ikiriza Ruhanga! Otamubanganisa. Mwikirize! Ekyo kihikire.

Hanu hashutamihi omushaija wa shuuti ya kihuura, ajwaire gaarubindi. Reeba hanu, sebo. Noikiriza? Ruhanga n'omutungi w'embabazi. Oshutami aho oine haniya. Noikiriza ngu Ruhanga naabaasa kukiza haniya egyo obe gye? Iwe oshutami aho aha muheru gw'entebe, ompangire amaisho. Ku oraabe noikiriza ngu Ruhanga naabaasa kukiza haniya egyo, Ruhanga naaza kukikukorera ku oraakyakiire. Nookiikiriza? Nookyakiira? Kare. Noobaasa kukikorera ku orakiikirize kwonka, aine embabazi. Eego, sebo.

60 Hanu hariho omukazi oshutami aho, arwaire endwara y'okugyenda mpora kw'eshagama omu mubiri gwe.

Kwonka ku araikirize, Ruhanga naamukiza, ku araakiikirize. Ningira ngu yaaza kukifeerwa, buzima kwo. Ninshaba ngu agirirwe embabazi. Tindikuhweza kurungi ogwo mukazi . . . Muky. Riley, noikiriza ngu Ruhanga naabaasa kukiza okwo kugyenda mpore kw'eshagama? Ku oraabe noikiriza, kyakiire! Amiina. IKiriza kwonka. Ruhanga ni murungi, tikwo, Stella? Yee. Ago n'amazima. Tinkareebaga ogwo mukazi omu magara gangye. Kwonka, Ruhanga, omu mbabazi Ze!

Hanu hashutamiho omukazi ondijo, ashutamire enyima okwo, enyima hare, ampangire amaisho. Nawe, arwaire endwara y'okugyenda mpore kw'eshagama, nawe. Yaaba naakiteekateekaho obwire obwo. Tinkareebaga ogwo mukazi omu magara gangye. Ahabw'okushanga ngu ogu mukazi ondijo yaaba aine oburwaire obwo, mpanga amaisho. Noikiriza ngu ndi nabi wa Ruhanga, nari omuheereza We? Ekindi orwaire omutima. Ekyo ku kiraabe nikwo kiri, imutsya omukono gwawe. Tokigurwaire hati. Ruhanga, omutungi w'embabazi, naayoreka ku n'Ohuriire hanu omu kyombeko eki ekiro eki. Ruhanga omutungi w'embabazi! Amiina.

61 Nihabaasa kuba hariho, abasiisi ni bangahi n'abagarukire enyima abaakubaasa kwemerera aha bigyere byanyu, mukagira muti, "Ruhanga, omutungi w'embabazi, ngirira embabazi"? Mwemerere aha bigyere byanyu. Naaza kubashabira, ku muraikirize ngu Naayenda . . . nimwenda embabazi hati. Ruhanga akuhe omugisha. Ruhanga akuhe omugisha. Ruhanga akuhe omugisha iwe. Owaagarukire enyima, yemerera aha bigyere byawé. Ruhanga omutungi w'embabazi! Ori-iwe . . .

Buzima timuhumire na kakye, omu mbeera egi, okuhitsya obu mutakibaasa kureeba ngu oku n'okuraganisibwa kw'obwire kwonyini. Buzima toboheirwe kimwe omu kigombe ky'ediini, n'ebindi bintu, okuhitsya obu otakibaasa kureeba ngu oku n'okuraganisa kw'obwire, Ruhanga omutungi w'embabazi.

Oriwe weena, owaayemerera, naaza kushaba omu kaanya kakye. Niinyenda ngu oze omu kanisa nungi y'Obutumwa bwijwire kandi-kandi obatizibwe omu kubatizibwa kw'Elikristaayo, Ruhanga akuhe Omwoyo Orirkwera.

62 Hariho ondijo orikubaasa kwemerera, akagira ati, "Nyowe, niinyenda kwijukwa. Ruhanga, omu mbabazi Zaawe, onyijukye. Tintwire nk'oku nshemereire kutuura. Obundi . . ." Ruhanga akuhe omugisha, mukazi 'we. Naiwe Ruhanga akuhe omugisha. Ruhanga akuhe omugisha. Ruhanga akuhe omugisha. Ruhanga akuhe omugisha. Ekyo ni kirungi. "Ruhanga, omutungi w'embabazi, ngirira embabazi." Ruhanga akuhe omugisha, ow'eishe-emwekazi. Hariho . . .

Ni bangahi abandi abari hanu, abaakugira batí, "Naaza kwemerera. Niinyenda ngu Ruhanga amanye ku niinyenda embabazi. Tintwire amagara marungi. Ntwire omuringo ogu na guriya. Ntwire ningwa niinyimuka, kwonka niinyenda embabazi Ze." Ruhanga akuhe omugisha, ow'eishe-emwe. Hagire ondijo owaagira ati, "Ruhanga omutungi w'embabazi!" Ruhanga akuhe omugisha, ow'eishe-emwekazi. Ruhanga akuhe omugisha, ow'eishe-emwekazi. Ekyo ni kirungi. Ruhanga omutungi w'embabazi! Ruhanga akuhe omugisha, naiwe. Ruhanga akuhe omugisha enyima okwo. Ruhanga naakureeba. Yemerera kwonka.

Noogira oti, "Kiine eki kirikugasha, Ow'eishe-emwe Branham?" Buzima. Yemerera haza orebe oku kiri eky'omutaano.

Ku oraabe ohamize buzima omu mutima gwawe, Ruhanga n'omutungi w'embabazi. "Tarikwenda muntu weena kuhwerekyerera, kureka naayenda ngu boona bahikye aha kweteisa." Ruhanga omutungi w'embabazi! Ai Ruhanga, tugirire embabazi.

63 Hati ni bangahi abari hanu hati, abaine kaada ezo z'ab'okushabirwa? Zibaire ziri ziiha? Za A na B, tikwo? Za A na B. Abantu boona abaine zaakaada z'ab'okushabirwa za A, mwemerere aha rubaju oru, kandi aba kaada z'ab'okushabirwa B nibaza kwemerera enyima yaabo.

Niinyebuuza yaaba hariho abaheereza bamwe hanu abaakuba beeteekateekire kumpwera. Ku baraabe bariho, barikwenda kwija hanu, nkaashemererwa kutunga obuhwezi bwanyu-bwanyu hanu, ahakuba nituza kushemererwa kushaba, haza kushaba-kushaba naimwe.

Eki, Baiburi neegira eti, "Obumanyiso obu buryaguma nibureebwa omu barikwikiriza." Eego, sebo. "Omu Izina Ryangye baryabinga baadaimoni, baryagamba endimi nsya." Tukikozire? Ahabw'embabazi za Ruhanga; titwe, kureka Ruhanga omutungi w'embabazi naahikiiriza Ekigambo Kye. Ruhanga!

Hati, ab'omu bugaari bw'abarema, ku muraabe nimwenda kubata hanu hanu omu maisho; twaza kubashabirira hanu honyini, tikirikutwetaagisa kubatsindika kubarabya omwo, omuri ako kahanda koonaa ka rwagati y'entebe aho. Reka, tikiine nshonga, ka baizire kimwe hanu. Twaza kubashabira buzima, buri omwe omuriitwe. Ruhanga omutungi w'embabazi!

64 Nimubaasa kwemerera aha rubaju rw'omukono gwa buryo hati, ahabw'edakiika nkye? Ow'eishe-emwe Brown yaija naiwe? [Ow'eishe-emwe yaagira ati, "Naija nyencakare," -Omur.] Naija nyencakare. Na-na-naaba nyine amatsiko ngu naija kuba hanu. Arahi, arahi Ow'eishe-emwe Outlaw, arahi Ow'eishe-emwe Fuller? Bamwe aha bantu abo abaabaire bari naanye hanu obu nyija okubanza, ka tugarukye. Nimwijuka ezo nyiriri z'okushabira abarwaire z'omutindo ogwa ira, obu twabaire twemerera aho kuhitsya obu waabaire oine kunkwata aha rubaju

rumwe, n'ondiijo muntu orundi rubaju, ahakuba nkaba mpweramu kimwe amaani?

Ni bangahi abaabaire omu nteerane ezo kare omu kutandika? Mureebe hanu. Nimwijuka obwire obwo, ku naabagambiire ngu Mukama Yesu akangira ngu, ku ndiba ow'amazima, ngu ebintu ebi biryabaho. Tikwo? Tukaba tutakagiraga ebintu nk'ebyo omu ebiro ebyo. Kwonka bikabaho, ahabw'okuba Ruhanga n'omutungi w'embabazi, kandi n'omwesigwa aha kuraganisa Kwe. Amiina! Ningyezaho kumara, kwonka tindikubaasa. Amiina! Ruhanga asiimwe! Haleluya! "Oo, nshemereirwe munonga ahabw'okuba ndi omwe aharibo!" Amiina. Oo, mugyenzi!

Hariho abantu haihi hoona hoona,

Abu emitima yaabo yoona erikubuguma

N'omuriro ogwashuumire ahari Pentekoote,

Ogwabashemeize gukabeeza;

Oo, nigwaka hati omu mutima gwangye,

Oo, Eiziina Rye rihimbisibwe!

Nshemereirwe munonga nimbaasa kugira ngu ndi omwe aharibo.

65 Oo, nyowe, enshoberwa, ow'okusaasirwa, omworo, empumi enshoberwa, nk'oku naabaire ndi; kwonka hati ahabw'embabazi Ze, embabazi Ze nydingi, nimbaasa kureeba Obukama bwa Ruhanga buri haihi. Amiina. Ebiragiro Bye ka ni birungi!

Yemerera aho, ow'eishe-emwe mugyenzi wangye, okwatirire ekibando kyawe. Ku oraabe otarikubaasa kwimuka, kare, yemerera hanu hanu, twaza kushuma aho tukushabire.

Kyo hati reka abaine zaakaada A na B z'ab'okushabirwa, bateere orunyiriri aha rubaju ruriya, reero tubashabire.

B'eishe-emwe abaheereza, hatariho kubanganisa, ku muraabe nimwikiriza okuta engaro aha barwaire, mwije hanu hanu reero mwemerere naanye aha kituuti eki. Tushabire abarwaire.

66 Hati imwe abeemereire omu runyiriri orwo, kuri nimwikiriza ngu Okubaho kwa Ruhanga kuri hanu, ngu Omwoyo Orikwera ari ahagati yaitu hati, naakora buzima eki Yaagambire ngu Aryakora. Kuri nyine amaani g'okubakiza, buzima nkaakikozire. Kuri nyine omuringo gwona gw'okubakiza, buzima nkaakikozire. Tingwine. Ni . . . Ruhanga akampa ekiconco kikye.

Tindi mbuurizi murungi. Tiinyine bwegyese oburikugasha kuba ombuurizi, abu barikweta ababuurizi ebiro ebi, obu-obu ebirikwetaagisibwa birikuteekwa kuba ebyo eby'okutendekwa omu by'ediini, kandi n'okuteekwa kuba na diguri nanka y'obwa dokita omuribyo, n'ebindi. Omuri ebyo tinshemereire. Kwonka Ruhanga naareeba omutima gwangye, kandi naamanya ngu niinyenda kugira eki Naamukorera, ekyo ninkisiima.

67 Omushaija omwe akangambira ekiro kiri, yaagira ati, "Ninteekeeka ngu ori omuntu murungi buzima, Omw. Branham, kwonka niinyikiriza ngu omu bwesigwa bwawe ogwire. Okahabira kimwe. Noomanya ku oricwerwa orurbanja aha muheru?"

Naagira nti, "Reeba, niinyenda kugira eki naakugambira. Ka ngire ngu iwe-ngu iwe noobaasa kuba ohikire, naakigamba ahabw'okuhajaana kwonka. Ku ndaabe ngwire, e-eki ntarikuteekateeka ngu nikwo ndi; kwonka ku naakuba ngwire, haza nkamanya hati hati ngu ninza kuhangaara mpitsye emyaka igana y'obukuru, kandi ngu Naija kuncwera orurbanja aha muheru gw'orugyendo, Angire ngu, 'Toshemereire kuza omu Iguru Ryangye, William Branham. Irooko oze aheeru okwo omu mwirima.' Noomanya? Nkaamuheereza buriizooba ry'amagara gangye okuhitsya obu ndigyenda, oku biri kwona. Ahakuba ntungire emigisha Ye mingi munonga ei ntashemereire, okuhitsya obu Arikunkirira amagara. We ni byona ebi na . . ."

68 Kyona eki ndi, kyona eki naakubaasa kugira amatsiko ngu ndyaba, nkitungire okuruga omu mbabazi Ze n'okusaasira. Nkaba ndi enshoberwa, ow'okusaasirwa, omworo, empumi; kwonka ahabw'embabazi Akankiza, mbwenu nyine amaani n'amagara marungi, ahabw'embabazi za Ruhanga. Nimpweza kurungi. Nyine eby'okurya, n'eb'yokunywa, nyine ebi ndikwetenga byona. Tarandaganiise kumpa ebi ndikwenda; kureka ebi nkyenire.

Kandi ku naakuba ntaikiriziibwe aha kiro ekyo, kunu nimmanya . . . Tindikureeba ahi naakuba ndi. Kwonka ku naakumanya ngu mpabire, na Ruhanga yantoraniire kuhaba, nkaayenda kuguma mpabire, ahabw'okuba niinyenda kukora okukunda Kwe. Kiri ngu, Nimmukunda okuhitsya obu ndikwenda ngu ebi Akunda bikorwe. Hati, ekyo n'ekigambo kigumire, kwonka nyine amatsiko ngu mwakyetegyereza omu muringo, omu mwoyo ogu naakigambiram. Mwareeba, niinyenda kukora okukunda Kwe. Obwire bumwe ku ngira eki Naamushaba, Akazunguza omutwe Gwe ati "ngaaha," ekyo ninkishemererwa munonga nk'oku naakushemereirwe ku Yaakugira ati "eego." Ahabw'okuba, obutoosha tushemereire kushaba tuti, "Ebi Okunda bikorwe." Ngaaha Ze ni nka . . . okwo kwaba kuri okukunda Kwe, okwo ni . . . Ni nungi munonga okukira eego Ze, kwaba kuri okukunda Kwe kukikora. Obwo nibwo orikuba Noomukunda buzima. Amiina.

69 Ku ntandika Kumugambaho, tinkaabaasa kwemerera. Oo, Ariho buzima, ariho buzima ahariinye! Banywani, Niwe-Niwe byona ebi ndi, byona ebi naakubaasa kuba, byona ebi nyine amatsiko ngu ndyaba, nibikomooka omuri Kristo Yesu, Ekigambo Kye.

Ninsiima ekiro eki ahabw'Omwoyo Orikwnera, kuhamya Obutumwa. Nimmanya nikibaasika, bamwe nibabaasa Kubuhakanisa, kwonka nk'oku naabagambira, nyine obujunaanizibwa aha Butumwa. Akamanyiso kakareebeka, kandi Ruhanga tayohereza akamanyiso kworeka ngu Ni Ruhanga kwonka. Obutumwa, Eiraka obutoosha rikuratira akamanyiso. Omuntu weena ekyo naakimanya.

Yesu akaija n'obumanyiso n'eb'y'okutangaaza. Akaba ari Omushaija w'amaani obu Yaabaire naakora obumanyiso n'eb'y'okutangaaza, kwonka ku Yaatandikire kushutama ahansi n'okutandika kureeta Obutumwa oburikugira ngu, "Nyowe na Tata tuba Omwe," oo, mугуензи, ахарібо екыо кікаба кігвіре. Mwareeba? Kwonka Eiraka rikaba niriteekwa kukuratira akamanyiso.

70 Musa akaheebwa obumanyiso bubiri, kandi buri kamanyiso kakaba kaine iraka. Ekyo kihikire. Nkakibuuriraho hanu obwire obuhingwire, omu mwanya gumwe, ahari, Eiraka Ry'Akamanyiso. Nikateekwa kugira e-Eiraka ry'akamanyiso. N'okuhinduka. Obutoosha nikwo kaba. Kaaba katabaire katyo, obwo nikaba katarugire ahari Ruhanga.

Omuntu ku arikwija n'obuheereza bw'omutaano obutari bw'obutoosha, oburikushangwa omuri Baiburi kuba Amazima, kwonka ogwo muntu akaguma omu nyegyesa niyo emwe eya ira y'ekigombe ky'ediini, omurugyeho. Ebye tibirimu kantu! Ruhanga takora ekintu nk'ekyo. Ekyo kintu, ni maanu ejunzire erimu emishwa, nari enyogori, nari oku orikwenda kukyeta kwona, y'emyaka makumi ana, makumi ataano ehwngwire, nibakigumizamu nibagyezaho kurya egyo maanu eya ira eyaagwire emyaka mingi munonga ehwngwire. Kandi Abaisraeli, omu rugyendo rwabo, emaanu nsya ekaba egwa buri kiro. Ago n'amazima. Okaba otabaasa kugibiika.

Titurikubaisibwaho eby'omu busingye buri obwahweire. Niturya Emaanu nsya, Emaanu eyaaheza eti kuruga omu Iguru, omu rugyendo rwaitu twaba nitugumizamu.

Ka twinikye emitwe yaitu.

71 Mukama Ruhanga, oriho buzima, Okubaho Kwawe. Nintekateeka aha mbabazi, Mukama. Tu-Tukureebire nookora ebintu bingi munonga! Tukuhuriire noogamba endimi, Twakureeba noozishoboorora noorabira omu bantu Baawe. Ai Ruhanga, Kukureeba nookiza abarwaire, noohumuura amaisho g'empumi, noogyendesa ebirema, ebifaamatu nibihurira, n'ebiteta nibigamba, k'ori Ruhanga mukuru kandi ow'amaani!

Kandi bwanyima kureeba ngu Okaraganisa eki omu biro by'aha muheru. N'obu twine okutooreza kwingi kw'obuntu, nabwo nikiba nikyoreka kwonka ku hariho Ruhanga oriho buzima, ahantu nanka, ow'amazima kwo. Kandi ninshaba, Taata ow'omu Iguru, ekiro eki, ngu tubaase kwehuriram Ruhanga munonga nikwo tureebe ku Ori hanu.

Kandi abantu aba abari omu runyiriri, ku baraarabe omu runyiriri oru, Mukama . . . ahakuba nitukora eki ahabw'okuba, tubaraganiise. Kandi Okagira ngu, "Obumanyiso obu buryaguma nibureebwa omu barikwikiriza."

Hanu hariho ab'eishe-emwe abaheereza beemereire hanu, abashaija abu Waatooraine ensi etakahangirwe, kuba eki bari ekiro eki. Okamanya, ensi etakabaireho, ku turyayemerera hanu ekiro eki, ahabw'okuba Togira bugarukiro.

72 N'ahabw'ekyo nitushaba, Taata ow'omu Iguru, ekiro eki, ngu abarwaire aba, ebimuga, empumi, abarema, abarwaire ekookoro, embeera yoona ei baakuba barimu, abaraarabe omu runyiriri oru, ka bamanye ngu Ruhanga ogwo omanya emibonano y'omu mutima naija kubakiza, ku baraakyakiire kwonka, bareebe kandi beetegyereze kwonka.

Omuntu owaabaire areeba enjoka y'omuringa nk'omunyamurwa kwonka . . . nk'ekyoma ky'omuringa kusha, akaba atakira, ahabw'okuba akaba atarikwetegyereza eki kyabaire kiri.

Eriizooba, Mukama, nikwo kiri. Ku baraareebe ekiconco, bakateekateeka ngu nikibaasa kubahwera, nibaba bataine kwetegyereza. N'okuhamya Okubaho kwa Ruhanga ori hanu kukiza. Kituhe, Taata. Ninshaba ngu kikorwe, omu Iziina rya Yesu. Amiina.

73 Niinyenda ogwo muteezi wa piyano muto, ku araabe naabaasa, omushaija nari omukazi, ou yaakuba ari weena, aze hariya ateere eki kyeshongoro, "Omufumu mukuru hati ari haihi, omusaasizi Yesu," omukazi muto ku araabe naabaasa, ahi omuteezi wa piyano ogwo yaakuba ari hoona. Hati ekyo ni . . .

Niinyijuka emwe omu saaviisi zangye z'okubanza z'okushabira abarwaire, omuri Fort Wayne, Indiana. Omwishiki muto w'omu Amish akaba ashutami, naateera egjo piyano, "Omufumu mukuru hati ari haihi, omusaasizi Yesu." Bandeetera omwana muto aha kituuti, akaba aremaire. Reero ku naabaire ninshabira ogwo mwana, yanguruka omu mikono yairuka aha kituuti. Nyina akagwa kihuumura. Nyinenkuru yaarekyera akatambaara ke ahaiguru, yaatandika kurira.

Reero ogu mwishiki muto w'omu Amish hati, ataine ki arikumanya kyona aha bikwatiraine n'Abapentekoote, ahabw'okuba akaba ari memba w'ekanisa y'aba Amish; kwonka akaba naateera piyano. Eishoky e rye riraingwa ryagwa ahansi; yaimuka ari omu Mwoyo atyo yaatandika kweshongora omu ndimi ezitarikumanywa, reero e . . . omu iraka ry'ekyo kyeshongoro. Ago mapeesha ga piyano gaagumizamu nigeeteera, nigateera ekyeshongoro, "Omufumu mukuru hati ari haihi, omusaasizi Yesu." Amiina! Tahinduka; oku abaire ari nyomwabazyo, n'eriizooba nikwo ari, kandi nikwo ariguma ebiro byona.

74 Hati ka tushabe hati nka . . . Hati buri omwe okwo aheeru ashabe. Imwe abarikwija omu runyiriri, ku turaabateho engaro, mwijukye, Yesu akagira ati, "Ku oraakiikirize, nookira." Nimukiikiriza? Hati twena ka tweshongore hati.

Omfumumukuru hati ari haihi,

Omusaasizi Yesu,

Ku Agamba . . . (Ka tuhumize amaisho gaitu hati turiyo nitweshongora) . . . emitima eshemererwa.

Oo, hurira Eiraka rya Yesu.

Eiraka erirukukirayo oburungi omu kyeshongoro kya baaserafi,

Eiziina erirukukirayo oburungi omu kanwa k'abantu,

Erirukukirayo . . . (Taata Ruhanga, gyendagyenda omu bantu hati) . . . ekireeshongoirweho,

Ai Yesu, Yesu ohairwe omugisha.

"Omukuru . . ." Hati mwaba nimwija hati, Ari hanu. Mwikirize eki ndikubagambira, nari mukiikirize imwe mwenka, Ari hanu. Buri omwe ori okwo hati ashabire abantu aba.

75 [Ow'eishe-emwe Branham n'abaheereza baashabira abarware obwo Ow'eishe-emwe Borders naayebembera abateeraine omu kweshongora. Ekicweka ekiriho busha aha rutambi rw'amaraka -Omur.]

Ai Mukama, niinyikiriza; Ai Mukama, niinyikiriza;

Byona nibibaasika, Ai Mukama, niinyikiriza.

Mwena abarikwikiriza, mwimutsye emikono yaanyu bati, mugire muti, "Niinyikiriza." [Abateeraine baagira bati, "Niinyikiriza." -Omur.]

Ngugu hanu omushaija ashutami hanu. Enshonga etumire naagamba nawe munonga; ariyo naitwa ekookoro. Ari aha bikoni ebi by'abarware. Tihariho buryo bwona omu nsi obu ogu mushaija yaakubaho, atari Ruhanga. Ekookoro ejjwire omu mara ge goona, kandi naaza kufa ku ziraabe zitari mbabazi za Ruhanga. Nkaabaasibwa ki mbaasa . . . [Ekicweka ekiriho busha aha rutambi rw'amaraka -Omur.] . . . ekigambo ky'okugumya omushaija ogu.

Iwe, noomanya ku abashaho bataine ki barikubaasa kukukorera hati. Ekyo waakihingwire, waareeba. Kandi ori . . . Oine omugisha gumwe gwonka, kandi ogwo guri omuri Kristo, waareeba. Kandi, ow'eishe-emwe, iwe, . . . naanye, ekiro kimwe ndyafa. Oryateekwa kufa, Yesu ku araikareyo. Ndyateekwa kukubuganayo, twemerereyo omu maisho g'Eicwero ry'Emanja. Kandi eki . . .

76 Niumanya, nk'omuri televijoni, televijoni ekozirwe omu buryo ngu buri kaire n'obu tuzunguza orukumu rwaitu, ekintu kyona, kikwatwa aha rutambi. Buri kigambo eki tugamba, kikwatwa aha rutambi. Hati, nimureeba, ekyo televijoni neekihanya. Hati, televijoni tekora kishushani, ehabura ago mayengo kugareeta omuri televijoni kwonka. Mwareeba, tekikora. Televijoni ekaba eriho obu Adamu yaabaire naagyendagyenda omu nsi, televijoni ekaba eriho obu-obu Musa yaarabire omu Nyanja Erikutukura, televijoni ekaba eriho obu Eliya yaabaire ari aha Kibungo Karumeeli, mwareeba, kwonka hati niho bagijumbwire. Mwareeba? Mbwenu hati hoonahoona ni . . .

Ebi tukora byona, na buri iraka, nibikwatwa aha rutambi oruritubugana aha Rubanja. Ebi tukora byona biryateekwa kutubuganayo. Ndyateekwa kubuuuzibwa ebigambo ebi mbagambira, nk'omuheereza. Ndyateekwa kubuuuzibwa, ahabw'okuba Ruhanga aryabinjunaana.

77 Hati kuri nimbaasa, nkaakukirize; 'habw'okuba otsigaizeyo obwire bukye munonga, ku araabe atabaire Ruhanga. Hati, naija naakushabira, nk'oku ndikumanya. Ow'eishe-emwe, ekintu kyona omu nsi, eki naakubaasa kukorera ogwo mushaija oshutami aho omu mbeera egyo, nkaakikozire.

Reka nkubuuze, waareeba. Wa-wa-waaherize kukira, ahabw'okuba Yesu naagira ngu okakira. Waareeba, "Emihiririzi Ye ekatukiza." Hati ku oraabe noobaasa, kuruga aha ntango y'omutima gwawe, kukyakiira, toraafe hati, kureka nookira.

Hati, mwareeba, hati nitumanya ngu televijoni neeraba omu kishengye eki. Ekyo nitukimanya. Titurikugireeba. Titurikubaasa kugireeba, amaisho gaitu tigakozirwe, ebihurikizo byaitu tibirikubaasa kugikwata.

Nikyetaagisa ekintu ekikozirwe, nari kyona eki kiri, ekyoma, kugikwata.

Nikwo na Ruhanga ariho atyo. Titurikumureeba, kwonka nitumanya ngu Ari hanu. Yesu Kristo nikwo ari. Reeba, Yaacheza Kweranga, oku Ayeyoreka. Hati, aha bikwatiraine n'okutambirwa, kuri Ayemereire hanu hati hati, taine ekindi eki Yaakukukoreire, waareeba, tihariho kindi. Kuri Omwana wa Ruhanga ayemereire hanu honyini, kandi Ayemereireho, Ari hanu, kwonka Taine kindi eki Yaakukukorera, ahabw'okuba Yaaherize kweyoreka hanu. Mwareeba? Kandi Ari hanu hati hati, nka burijo, kukutambira akakukiriza kimwe.

78 Kandi ogwo mukazi mukye okwo akangambira, yaagira ati, "Oshabire omugisha, kandi waaragura nari ekindi kintu," ahariwe, ngu naaza kuzaara omwana, ashutami omu kagaari k'abarema ako. Nikwo kyamubaireho, akazaara omwana.

Mbwenu hati ogwo mukazi mukye oshutami hanu. Hati akashemezibwaho omwigo, kyamushanyaraza. Buzima, tubireebire ebantu ebyo bingi nibibaho. Hati, ow'eishe-emwekaza mukye, nimmanya ngu ori Omukristaayo kashushu. Tindikumanya ahabw'enki Ruhanga atumire waashutama aho. Niinyikiriza, obundi, n'ahabw'okuba oine . . . Okwikiriza, no-noogyezaho kugira okwikiriza, kugira ngu oimukye aho, waareeba; kwonka hati reeba, ka turekye kugyezaho kukugira, ka tukugire hati, mwareeba, nituza-nituza kuhikaho. Nikyo ekyo kyonka, kyaza kutandika hati hati, kandi nituza kukira. Kandi imwe abari okwo omu bugaari bw'abarwaire obwo, eki, nari-nari oku muri kwona, mwijukye ku Kristo ari hanu.

79 Hati noogira oti, "Hariho omuntu, orikureeba ekishushani kyangye nikirabaho." Oo, eego.

Nangwa n'Ebigambo bya Yesu Kristo, ebi Yaagambire obu Yaabaire ari hanu omu nsi, nibiraba omu kishengye eki hati. Tibifa. Ni bangahi abarikumanya ngu ekyo na sayansa neekihamya ku n'amazima? [Abateeraine baagira bat, "Amiina." -Omur.] Mbwenu, niki? N'ahabw'ekyo Omwoyo akwata ekyo Kigambo ekyahandiikirwe, Akyoreka. Oo, ekitiinisa!

Ari hanu. Ari hanu honyini hati, Mukama. Nitu . . . Tureebire bingi munonga, Akozire bingi munonga, okuhitsya obu turikushusha nk'aba, nimumanya, biba nk'ebyatuteeza entsibo. Ku turaayetegyereze, eki ti kintu nanka ekitarikwetegyerezibwa, ekintu ky'obwengye bw'ediini; kureka n'ekirikuhamya eki Yaaraganiise ngu Aryayeyoreka omu bwire obu, nikyo ekyo kyonyini eki Arikworeka hanu honyini omu maisho gaitu hati hati. Ka n'ekintu ekirikutangaaza! Ekyo tikirikutangaaza? [Abateeraine baagira bat, "Amiina." -Omur.]

80 Hati ikiriza. Nookiikiriza? Ikiriza ngu torikuza kufa. Noosa kubaho, kandi noosa kuha Ruhanga ekitiinisa. Noosa kuha Ruhanga ekitiinisa. Orabatiziibwe? Ori Omukristaayo, nikwo? Ori Omukristaayo. Kare, nooyenda kubaho ohaise Ruhanga ekitiinisa. Kyo gyenda obeho, ow'eishe-emwe mugyenzi wangye. Omu Iziina rya Yesu Kristo, kira!

Kandi, ow'eishe-emwekaza, nooyenda kutambura ahabw'ekitiinisa kya Ruhanga, kandi oreeberere omwana waawe; kyo tambura, ow'eishe-emwekaza, omu Iziina rya Yesu Kristo!

Imwe, mwena, mukore mutyo, omu Iziina rya Yesu Kristo! Muteebwa egi Westward Ho Motel hanu ekiro eki, Okubaho kwa Ruhanga kwayeyoka hanu. Tashoroora mu bantu. Naayenda ngu mwikirize kwonka. Nimumwikiriza hati? [Abateeraine baagira bat, "Amiina." -Omur.] Amiina. Ruhanga abahe omugisha.

Ka twinikye emitwe yaitu hati. Tindikumanya ou batoorraine, ku-kusiibuura abantu. Ow'eishe-emwe Mushegian hanu, ija hanu honyini, ow'eishe-emwe. Yaaza kutusiibuura n'eshaara. Ruhanga abahe omugisha.



www.messagehub.info

Obutumwa obu bukabuuirirwa
William Marrion Branham
 "... omu biro by'eiraka ..." Kush 10:7